

**Liberté**

# Fiche technique

**Nom de l'auteur** Albert Volral.....  
**Adaptateur** :.....  
**Adresse** :Rue des Capucines , 13.....  
:...6010 Couillet.....  
**Localité**  
:0476483434.....  
**Téléphone** E.Mail : albert.volral@gmail.com

Société des auteurs: Sabam

Titre de la pièce **Liberté**

Nombres actes	Décors	Comédie	Rôles masculins	Rôles féminins	Rôles enfants
		Dramatique			

## Résumé

La démocratie s'effrite de jour en jour au profit de l'extrême droite qui grappille avec démagogie le pouvoir en utilisant tous les moyens. Hélas, ils y arrivent par la force et commencent par emprisonner les responsables politiques et syndicaux. C'est ainsi que se retrouve enfermer dans un asile psychiatrique le secrétaire d'une centrale syndicale. Il va vivre jour et nuit avec: Un schizophrène, un paranoïaque et un mystique. Chantage, tortures, vexations seront nourritures quotidiennes de ce démocrate. Sans oublier la lâcheté et les dénonciations de la " belle maman"...Il lui reste comme seul support l'amour de son épouse.

## Distribution

**3 fous----- L'âge et le sexe au choix du metteur en scène**  
**1 psychiatre---35 à 55 ans**  
**1 Infirmière - 25 à 35**  
**La belle mère--55 à 65 ans**  
**L'inspecteur-- 40 à 50 ans**  
**L'épouse du syndicaliste 35 ans**

# Libêrtè...Angouches

De

Jeanne Lamoline et Albert Volral

## Résumé

La dépression économique devient réalité, la démocratie s'effrite de jour en jour au profit de l'extrême droite qui grappille avec démagogie le pouvoir en utilisant tous les moyens. Hélas, ils y arrivent par la force et commencent par emprisonner les responsables politiques et syndicaux. C'est ainsi que se retrouve enfermé dans un asile psychiatrique le secrétaire d'une centrale syndicale. Il va vivre jours et nuits avec: un schizophrène, un paranoïaque et un psychopathe. Chantage, tortures, vexations seront nourritures quotidiennes de ces nouveaux parvenus au pouvoir. Sans oublier la lâcheté et les dénonciations de la " belle maman"...Il lui reste comme seul support l'amour de son épouse.

Cette pièce est une fiction et toutes ressemblances avec des personnes existantes ou ayant existé seraient tout à fait fortuites.

## Distribution vue par l'auteur.

	Souffrent de maladie mentale.	L'âge et le sexe au choix.
Albert		
Jules		
Gaston		
Roger	Syndicaliste	40 à 50 ans
Docteur	Psychiatre	35 à 55 ans
Cathy	L'infirmière	25 à 35
FernandeLondo	La belle mère	55 à 65 ans
Môrice	L'inspecteur de la Sûreté	40 à 50 ans
Mady Leureux	L'épouse du syndicaliste	35 ans

## Décor suggestion

Décor unique en tentures noires. Les espaces de jeu sont définis par l'éclairage et quelques accessoires mobiles qui suggèrent les lieux scéniques.

## Sin.ne 1 Roger les fous adon Cathy et le docteur

A l'ouverture du rideau Roger est seul dans une pièce sans fenêtre ni porte seul l'éclairage crée l'ambiance. Une chaise, un sceau hygiénique, une ampoule électrique suspendue.

### *Roger*

Oyî, Mady ...Non, ça n'est nèn possible, c'est yin mins dj' rêve ! Drouvèz, vos m'ètindèz drouvèz ! Dj' vou d'visér ô rèsponsâbe . . . Bén rèspondèz bon dieû bos ! . . . Di qué drwèt ç'qui vos m'wârdèz droci ? Vos pèrdèz l'tièsse ! ... Ni m'oblijèz nèn à disfoncér l'uch... (Entrée de Cathy par un sas pivotant ou tenture)

**Cathy**

Rapôjèz-vous, Mossieû Leureux, tout va s'arindjî.

**Roger**

Dj' vos è priye, Mad'zèle ... Mins pouqwè ?

**Cathy**

Vos avèz yeû yin p'tit accidint, rén d'ôte ... Asteûre, i fôt vos r'pôsér,

**Roger**

Dj' n' seû nén scrance, dj' m' sin bén.

**Cathy**

Rapojèz-vous, l' docteur vinra vos dire yin p'tit bondjoû. (Elle sort)

**Roger**

Non, ni vûdèz nén. Co yin mot, Mad'zèle ! Dj' n' mi ... Oyi, èle divreut yèsse avè mi ! (Entrée des fous)

**Albert**

Bondjoû Mossieû l'Président, vos dalèz bén ? Mi ètout, merci.

**Roger**

Dj' n' seû nén Présidint !

**Jules**

N' fuchèz nén djin. nè Mossieû l'Présidint.

**Roger**

Vos flotchèz sur l'pèrsonâdje, dj' m' n-ome Roger Leureux ... Vos èstèz malade ètout ?

**Albert**

Non Mossieû, nos féyons pârtîye di vo r'mède !

**Roger**

Qué r'mède ?

**Jules**

Vo n'âme Mossieû. Nos d'vons vos disloyî dèl infîer cultûrèl pou scapér vo n-âme.

**Roger**

Pou l' momint on fé du tèrrorisme avè tout .

**Jules**

El seûle cultûre possibe, c'èst l'cèn di no sôveû.

**Albert**

Jules a rézon, paç qu' i comprind.

**Roger**

I comprind qwè ?

**Jules**

L' djudj' mint dj nos acsions.

**Albert**

Dj' wè dins vos îs, qu' vos n' èstèz nén des n'ôtes, vos èstèz qwè pou l'vré ?.

**Roger**

Dj' vos l' é d' dja dit : rèsponsâbe du sindicat. Non mins, vos vos sintèz bén ? A qué djeu ç' qui vos djouwèz ?

**Gaston**

A mas, vos savèz ç' qui Albert à fé Mossieûr ?.

**Roger**

Non !

**Gaston**

I a mindjî tout m' satchot d' mas .

**Albert**

Asteûre, qu' vos avèz disvolpé nos s'crèt à yin ètranjè, à dj' ngou man'nèt, èyèt dimandèz pârdon à Jules lyi qu' èst rèsponsâbe di nos âmes.

**Roger**

Bon, c'èst fini, arètèz vo cinéma ... Dj' dwè dire qui ça n' èsteut nén mô djouwé, on pout minme dire qui vos èstèz dès fameûs comédiyéns (Albert – Jules et Gaston reprennent leur place dans le fond de la chambre à l'entrée du docteur et de Cathy)

**Docteur**

Comint va no malâde ?

**Roger**

Dj' n' seû nén malâde, èyèt vo dalèz m' dire ç' qu' dj' fé droci.

**Docteur**

Nos è r-dviz'rons pus tôrd, Mossieû Leureux

**Roger**

Non mès vos m'pèrdèz pou yin sot ou bén qwè ?

**Docteur**

Achidèz-vous Mossieû Leureux èyèt fuchèz pôjère.

**Roger**

Vos dalèz comincî pa m' dire pouqwè ç' qui dj' seû droci.

**Docteur**

Rèspandèz d'Mazèle.

**Cathy**

Vos èstèz rascrôvè dès niérs, vos avèz fé ène crîje di soterîye.

**Roger**

Non, mins ça dira. Dj'm'souven . . . L'gouvèrnemint, oyi c'èst ça. . . Dj'm'aprèsteû di vûdî dèl môjone avè Mady, lès flics sont arivès, is m'ont kèrdjî dins leû n'ôto, dj' m'é s'pignî, dj'è sintu come ène piqûre ô bras . . .(Il s'approche du Docteur et le prend par la cravate) Dj' vos done deûs munutes pou m'fé vûdî d'd'ci.

**Docteur**

Dj'crwè qu'vos èstèz entrin di cafougnî m'cravate.

**Cathy**

Rapôjèz-vous Môssieu Leureux.

**Roger**

Al fin, vos dalèz ém'dîre ç'qui dj' fé roci.

**Docteur**

Dj'wvè, no malâde èst toudis aradji. Vos avèz di qwè lyi fé ène piqûre Mad'zèle ?

**Roger**

L'preumî qu'i m'djonke , dj' lyi asplati si mouzon.

**Docteur**

Vinèz mès amis boutèz-m' yin côp d'mwin pou édî Roger a r'trouvèr l'boûne vôle. 'Les trois fous, Cathy et le docteur s'approchent de Roger)

**Roger**

N'apochèz nèn sins qwè ,.. (Ils l'immobilisent) Vos vos rindèz compte di ç'qui vos fèyèz . . . Non ! Vos n'avèz nèn l'drwèt. (Cathy fait l'injection)

**Docteur**

Merci mès amis, yin djoû vos s'rèz bénis. (Les trois fous s'agenouillent et embrassent les pieds du Docteur)

**Cathy**

Ca va Mosieû Leureux ?

**Docteur**

Bon, nos p'lons cominchî . . . Vos scrivèz tout , sins rén rouviyî.

**Cathy**

Bén, Docteur

**Docteur**

Vos vos lomèz comint ?

**Roger'**

Roger Leureux

**Docteur**

Vos avèz vèyu l'djoû ?

**Roger**

(Comme un automate) Le 4 di septambe 1940

**Docteur**

Vos èstèz intré ô syndicat ?

**Roger**

Déçambe 1960.

**Docteur**

Vos f'yèz qwè ô djuste come mèstî ?

**Roger**

Sècrètére dèl centrâle dès ouvrîs

**Docteur**

Avè vos p'tits soçons, vos avèz èmantchî yin complot di conte l'état !

**Roger**

Ca n'èst nèn l'vré.

**Docteur**

Nos avons dès preûves.

**Roger**

Dj' n' vos crwè nèn.

**Docteur**

Vos d'djèz ?

**Cathy**

Mossieû Leureux dijèz tout ç'qui vos savèz !

**Roger**

Mins dj'n'è dè sé rén, vos v'lèz m'fé div'nu sot ? .

**Docteur**

Bén, r'prin.nons tout ... Vo nom ?

**Roger**

Roger Leureux. (L'effet du médicament s'estompe progressivement) Alèz-è ô diâle.

**Docteur**

Vos n'avèz nèn mètu l'dôse qu'i faleut, Mad'zèle ?

**Cathy**

Sia, Docteur.

**Docteur**

Cathy, i nos fôra trouver ène saqwè d'ôte pou skèter s'tièsse di bos. Dj'd'è pârl'ré ô directeur.

**Roger**

Vos dalèz m'teni lontins dins vo môjone dès sots ?

**Docteur**

Vos èstèz à nos merci ... Dimwin si vos èstèz rézonâbe, putète qui vos s'rèz libe ... Mès d'avant nos avons dandjî di con'nèche saquantès afères di sur vos p'tits amis.

**Roger**

Non mins vos-èstèz div'nu tètous sots, ... mins qwè ç'qui m'arive ?

**Cathy**

Rén d' contréle, Mossieû, i fôra fé yin grand r'nètyâdje di vo cabu.

**Roger**

Yin r'nètyâdje?

**Docteur**

Nos-avons dès médecéns fôrt spèpieûs dins lès opèrâcions dèl tièsse.

**Cathy**

Vos n'd'vèz pus awè di pèrsonalitiè quand vos vud'rèz d'd'ci, vos s'rèz ô sèrvice di l'Etat.

**Roger**

Di qwè ? Qué Etat ?

**Cathy**

L'sé qui l'peûpe souwète, c'è-st-a dire ène société prope, avè dès djins dévouwés à no noûvia présidint.

**Roger**

Yin présidint !!!

**Cathy**

Oyi, c'èst Mossieû le Président Baras, lyi qu'èst mèsse di no payîs

**Roger**

C'asteut bén l'vré ... Gn-a combén d'tins qu'dj'seû-ci ?

**Docteur**

Mossieû Leureux, nos vos d'vons dès èscuses, vos avèz l'drwèt di sawè.

**Roger**

Di sawè !Eyèt i fôt vos crwère ... Binde di saligots.

**Docteur**

Fèyèz atincion a ç'qui vos d'jèz, Leureux.

**Roger**

Vos èyèt lès-ôtes, vos n'èstèz ô pouvwère qui pou vos rimpli lès potches an tchantant l' bén fé du nouvia régime !vos ratindèz, l'peûpe va révèyî èyèt adon vos compt'rèz vos ochas.

**Docteur**

Dj'n'é né bén ètindu.

**Cathy**

Dj'vos-è prie Mossieû Leureux, tèjèz-vous.

**Roger**

M'tère ... Dj'r'dî qu'vous èyèt lès ôtes, vos n'èstîz qu'ène binde d'incapâbes, avè yin goyî aswèfè di pouvwèr.

**Docteur**

Vos avèz l'tièsse t'ossi dûr qui du fièr, Mossieû l'sindicalisse, mins rapôjèz-vous nos-avons lès moyéns èyèt lès ostis pou vos skér.

**Roger**

Yin djoû dj' vos f' rèz payî tout ça , ça comptèz di sur mi !

**Docteur**

Dimwin vos dirèz ô méd'cen di comincî l'r'mède.

**Cathy**

Bén, Docteur... Nos fèyons vûdî lès ôtès malâdes ?

Cathy claque dans ses mains, les fous se rangent et sortent en saluant.

**Roger**

Qwè v'lèz sawè ô djusse?

**Docteur**

Mossieû Leureux d'vènt rézonâbe ? Dj'vos choûte,

**Roger**

Mins, dj' n'é rén à vos dire al fin ... Sia, pouqwè ç'qu' m'feume n'est nén ci ?

**Docteur**

Put-ète qu'èle ni souwète nén vos vîr ?

**Roger**

Minteû.

**Docteur**

A d'mwin Mossieû Leureux èyèt ... boune nût (Roger est assis sur une chaise et pense à Mady, Flash Back)

## **Sin.nes 2 Mady Fernande adon Roger**

**Mady**

Vos vid'zèz come si dj'èsteû d'mèrée ène pètitte fiye ; vos roubliyèz qu' dj'è trente cinq ans èyèt mâriyée.

**Fernande**

si wère ...

**Mady**

Qwè v'lèz dire ?

**Fernande**

Dj'vou dire qui vos n-ome d'vreut s'lomér « L'Arlésienne », on n'èl wèt qui pou mindjî, ou bén dôrmu ôsès p'titès-eûres.

**Mady**

Qwè ç'qui ça pout vos fé, ça n'est nén ...

**Fernande**

Mès ognons ... Dj' sé, mins vos èstèz m'fiye .

**Mady**

C'est bén damâdje.

**Fernande**

Pou lès saquantès anéyes qui dj'è co à vikér, vos n'crwèyèz nén tout d'minme qui ça va co continuwèr lontins.

**Mady**

Comint ça ?

**Fernande**

Bén dèl vikériye qui dj' mwin.ne droci, èyèt, d'ètinde vos brètes tous lès djoûs avè vo n-ome.

**Mady**

On n'si fèt nén margaye on d'vize, v'la tout.

**Fernande**

Grâce à Dieû, dj'è co mès deûs orâyes, èyèt èles vont co bén . . . Fôt nén prinde vo mame pou ène vîye sote... Dj'vwè clér savèz mi.

**Mady**

D'yin î seûl'mint

**Fernande**

Ni vos foutèz nén d'mi Mady, yin djoû vos s'rèz p'tète come mi.

**Mady**

Putète, mins nén ôstant ...

**Fernande**

Soyante, c'est ça qu'vos v'lèz dire ?

**Mady**

Vos comperdèz râde.

**Fernande**

Dj'sé, mins d'vant di m'mète dins ène môjone pou lès vîs, i fôra ratinde lontins. On n'si fé nén quite di mi t't'ossi ôjimint.

**Mady**

Pon d'imbaras, avè vo mwè caractère, gn-a nulu qui vouèreut s'kerdjî d'vous.

**Fernande**

Mêrci !

**Mady**

Gn-a nén d' qwè !

**Fernande**

Ca fé combén d' tins qu' vos èstèz aloyîe avè à bia Roger ?

**Mady**

Ça fé,dîj'ans.

**Fernande**

Dîj'ans qui vo n-ome profite di no môjone ?

**Mady**

L'môjone ès ôstant da lyi qu'a mi.

**Fernande**

Vos roubliyèz qu'a l'môrt di vo popa, c'è-st-a mi qui ça r'vèneut.

**Mady**

Pârdon ! L'môjone c'est d'à mi. Vos èstèz seul'mint l' lodjeûse .

**Fernande**

C'est tout l'rèspèt qu'vos-avèz pou vo mame qui vos a alvé.

**Mady**

C'è-st-a dire pou nèn grand chòse.

**Fernande**

Vos l'avèz yeu yin p'tit còp trop bèle, v'la tout.

**Mady**

A qui d'èl fôte . . Dj' n'pleû nèn fé yin pas sins qu'vos stí pa drí mi . . . Et co asteûre vos m'survèyîz come si dj'èsteû yinn' éfant.

**Fernande**

C'est pou vos bén m'fiye.

**Mady**

Dj'dè vûde bén toute seûle sins-awè yin andje gârdien, va co bén qu'vo n'tènèz nèn l'tchandèle quand dj'seû avè Roger.

**Fernande**

Di s'costé ça n'pout mô d'riskî.

**Mady**

Di qué riske ç'qui vos pârlèz ?

**Fernande**

Vos l'savèz t't'ossi bén qu'mi.

**Mady**

Vos n'p'lèz nèn yèsse yin pô pus clér ?

**Fernande**

Môrice ça n'vos dit rén ?

**LMady**

Sifé bran.mint !

**Fernande**

Bran.mint, dj' m'èl dijeû ètou. I-gn-a lontins ?

**Mady**

Qwè ?

**Fernande**

Vos antise avè Môrice.

**Mady**

Nos èstons coumarâde rén d'ôte.

**Fernande**

C'est pou ça qui l'ôte djoû dins cujène, vos èstîz aclapée à sès lèpes!

**Mady**

I m'a fôrci . . .L' preûve, dj'lyi é dit di n'pus jamés r'mète lès pîds droci.

**Fernande**

C'est damâdjès, i m'pléjeû bén.

**Mady**

A qu'èl djeu v'léz djouwér man ?

**Ernande**

Rén, seûl'mint d' wètí a vos rinde eûreûse èt r'wètí ôsès liârdès di vo popa.

**Mady**

Dijèz pus râde ôsès votes.

**Fernande**

Choutèz m'fiye, pou vos pârlér avè franchîje, vo n-ome n'a pus pont d'sintimint pou vous.

**Mady**

Qwè dè savèz ?

**Fernande**

Ca s' vwèt! Pou yin preumî i n' èst jamé là ! C'è-st-à pwène si i m'dit bondjoû.

**Mady**

Dj'sé qui vos n'pouvèz nèn l'sinte, mins mi dj'l'vwè toudis voltí.

**Fernande**

Lèyèz-m'rîre . . . Vos fèyèz chènance paç qu' vos avèz peû d' li Mady.

**Mady**

Dj'vos-è prîye moman, n'm'rindèz nèn l'situâcion pus disbôtchante, c'èst d'ja assèz malôji insi,

**Fernande**

Paç qu' vos v'lèz bén !

**Mady**

Qwè f'rîz à m'place ?

**Fernande**

Lyi d'mandèr d'tchwèzi ètrè vous èyèt s'sindicat.

**Mady**



Pinsèz qu'on pout fé chwèsi yin-ome insi ?

**Fernande**

Vos avèz trent'cinq ans m'fïye, pont d'èfant, vos pl'èz toudis r'fé vo vîye avè ène saquî qui vos vwèz voltî, èyèt qui s'reut pus djon.ne qui vo n-ome

**Mady**

Avè Môrice p'tête ?

**Fernande**

Pouqwè nèn ? I n'est nèn mô, bèle situâcion ...

**Mady**

Yin flic ! Vos-ap'lèz ça ène bèle situâcion!

**Fernande**

Môrice n'est nèn yin flic come tèrtous : mèsse inspecteûr à l'sur'té di l'Etat.

**Mady**

Rézon d'pus.

**Fernande**

Fôt tout d'minme rapôjî lès bouneùs djins di conte lès man.nèts sindacalisses, èyèt tèrtous lès ôtes.

**Mady**

Fôt nèn dire ça man, sins yeûs pus pont d'libèrtè nos s'rin.nent come an Iran....

**Fernande**

C'est bén damâdje qui ça n'est nèn l'minme pa-ci, vo n-ome s'reut dispus l'ontins al gayole !

**Mady**

Vos m'fèyèz mô an pârlant insi ... Vos savèz ç'qu's'passe lôvô ?

**Fernande**

Non !

**Mady**

D'avant d'vos mète ô prijon, is vos baboure.nut dès-eûres d'asto.

**Fernande**

C'est qu'is-ont fé ène saqwè d'mô !

**Mady**

Oyi, pou awè pinsè tout wôt leû disbôtch'mint, leû pwène, èyèt d'awè criyî leû misère ! V'la pouqwè on lès mèt ô trô.

**Fernande**

C'est dèle fôte dès sindicats qu' li payîs a l'cu ô-r'viêr, vo popa n'a jamés fé grève lyi, i bouteut.

**Mady**

Come ène bièsse oyi ...

**Fernande**

Boutér n'a jamés fé moru nulu.

**Mady**

Vos dè pârlèz à vo n'ôje, vos n'avèz jamés t'nu qu'ène clicote dins vos mwins. Vo vikâdje vos l'avèz passé à prinde lès poussères, èyèt d'cachî mizères à m'popa .

**Fernande**

Vo pére faleût l' poussî ô cu pou l'fé ossî.

**Mady**

C'est putète pou ça qui m'popa èst môrt.

**Fernande**

Non, Mady , vo pére a stî tuwè pa yin sindicalisse.

**Mady**

C'esteut yin acsident, vos l'savèz bén.

**Fernande**

Eyèt tout ça, paç qu'i n'a jamés v'lu s'mète du sindicat.

**Mady**

Non man, c'est paç qu'i v'leut fôrçî yin piquèt d'gréve, on l'a poussî, i a tcheû, maleureûs'mint s'tièsse a bukî d'ssus l'bôrd du trotwêr. C'est vous qui n'a jamés v'lu qu'i s'mète du sindicat, paç qu'i faleût payî ène cotisâcion èt qui pou vous lès liârls estîn'nut pus impôrtant qu' d'disfinde nos libèrtès.

**Fernande**

Libèrtè, libèrtè ! Lèyèz-m' rire Mady, bén is sont lès preûmis a nèn rèspectér lès libèrtès dès-ôtes,

**Mady**

Eyeûs' ç'qui vos avèz lu ça on vous ?

**Fernande**

Nul pô ! Dj'l'é vèyu, nèn pus tôrd qu'ayèr

**Mady**

Eyèt, vos avèz vèyu qwè ?

**Fernande**

Dès sindacalisses qu'èspétchin.nent dès-ouverts d'intrér dins leû boutike

**Mady**

Si ène masse d'ouvris chwèzis'nut ! d'fé grève, c'est l'djusse qu' lès ôtes chuve.nut come dès bèdos. C'est ça l'drwèt du peûpe, nèn l'contréle.

**Fernande**

Eyèt l'drwèt di boutér, qwè dè fèyèz?

**Mady**

Téjèz-vous va mame, vos roublyiyèz qui lès grévisses s'bat'nut ètou pou lès sés qu'n'sont nèn sindikès.

**Fernande**

Mi dj' n'vwè qu'ènn'afère, c'est qui l'payis n'âra Bén råde pupont d' libèrtè.

**Mady**

C'est pus råde avè dès idéyes come lès votes qu'on pièdra nos libèrtès, m'fye.

**Fernande**

Putète, mins ç'qui nos fôt c'est ènn' miyète pus d'alûre.

**Mady**

Dj' n' comprend nèn comint ène feume d'ouvri pout yèsse t't'ossi à dwète.

**Fernande**

Vos roublièz qu'm'papa èst môrt dins yin camp di prijonîs.

**Mady**

Vos èstèz Bén sur man ?

**Fernande**

Oyi, pouqwè, vos n'mi crwèyèz nèn !

**Mady**

Non ! L'véritè, c'est qu'vo pére a stî diskindu pa yin rézistant... V'la pouqwè vos dè v'lèz ôsès ceus qui r'chè'n'nut di près ou Bén d' long à l'imâdje dès cés qu'on tuwè vo pére, èyèt vo n-ome ! Paç qu' dins l'fond d'vos minme gn-âra toudis yin sintimint d's'r'vindjî.

**Fernande**

Vos roubliyèz ène miyète qu' vos pârlèz à vo mame.

**Mady**

Nèn du tout, c'est Bén disbôtchant d'awè ène moman avè d' parèyes idéyes .

**Fernande**

Vos avèz Bén råde fini di fè l'procès d'vo mame !

**Mady**

Dj' sé qui ça n'fèt nèn pléji d'ètinde sès quate véritès, sûrtout pa s'fye.

**Fernande**

C'est vo n-ome qui r'monte vo tièsse conte di mi !

**Mady**

Rapôjèz-vous, Roger n'a pont d'tins à piède avè vous.

**Fernande**

Dj'vwè, vos n-ome vos a Bén scolè.

**Mady**

Eureûs'mint qui c'n'est nèn vous, paç qu' vos âriz fè d'mi ène n monse !

**Fernande**

Après tout si ça vos plét d' awè ène vîye d'infîer avè vo n-ome.

**Mady**

Choûtèz man, c'est Bén djinti di vos mèlér d' m'bouneûr, mins dj'r'grète, dj'sèu assèz grande pou yèsse rèsponsâbe di mi. Asteûre dj'vo'reû Bén qu'vos m'rindje yin p'tit pléji.

**Fernande**

Dijèz toudis.

**Mady**

Di clapér vo mwès bètch!

**Fernande**

An ratindant, vos m'oblidjèz à supôrtér vo n-ome.

**Mady**

Rèn n' vos èspèchè di d'mèrer dins l'pièce d'a costè dilé l'tchôfâdje... Vos âriz Bén tchôd l'ivièr insi.

**Fernande**

Mwèche fye qu'vos èstèz, fè passér s'mame padri yin ètranjè.

**Mady**

Pârdon, èm'n-ome ! (Entrée de Roger)

**Roger**

On pârlèut d'mi ?

**Fernande**

Vos èstèz Bén timpe bia gârçon !

**Roger**

Ca vos disrindje ?

**Mady**

...Di vos vîr rintre di si boun-eûre. Nèn l'vré man ?

**Fernande**

Bén sur, dj' djipe di jwè !

**Roger**

On n' vos è d' mande nèn ostant ! (En déposant sa serviette sur le buffet)

**Fernande**

Vo malète ! Vos l' fèyèz èsprès !

**Roger**

Ô! Pârdon . . .

(s'adressant à sa femme... El din.nér èst prèsse Mady ? Nos d'vons nos rasimblér dins-ène eûre.

**Fernande**

C'èst tout ç'qui vos avèz à dire à Mady, vos avèz dèl chance qui dj' n' seû nèn vo feume, .

**Roger**

Si vos continuwèz à stitchî vo néz dins ç'qui n'vos r'wète nèn, vos dalèz m'fôrcî à vos tapér à l'uch.

**Mady**

Vos n'p'lîz nèn asprouver di fé yin èfôrt vous ôtes deûs ! Vos èstèz toudis entrin di vos fé margaye.

**Roger**

Ni fèyèz nèn l'bièsse Mady, vo mame ni pout né m'sinte, èyèt mi co mwins, vos l' savèz bén, adon . . . Bon asteûre èscuz'ém' bèle moman, mins dj' n' é pont d' tins à pièrde à choûter vos bièstrîyes. Mady ç'qu' vos m' donèz à mindjî si vos plé?

**Fernande**

El sindicat ni vos nourî nèn ? .

**Roger**

Eyèt vous vos mindjèz toudis d' ssus l' compte di vo bia gârçon ?

**Mady**

E bén, l' dîn.nér n'èst nèn prèss' ?

**Roger**

On pout sawè pouqwè ?

**Fernande**

Bon dj' vos lèye an amoûreus. .

**Mady**

Vos rêchèz d' dja ?

**Fernande**

Prinde l'ér, èyèt après dj' diré putète ô cinéma.

**Roger**

Boune idéye,( Fernande sort)

**Roger**

Dj' vos é quèstionè.

**Mady**

Pou l' dîn.nér, è bén dj' n' é nèn yeû l' tins.

**Roger**

Nèn yeû l' tins! Qwè fèyèz di vo djoûrnéye d-abôrd ?

**Mady**

Rén ! .

**Roger**

C' n' èst wére di chôses.

**Mady**

Qwè v' lèz, quand dj' fé l' mindji ou bén vos èstèz astôrdjî ou bén vos rouvîyèz di r'vènu. Vrémint ça n' m' amuse pus !

**Roger**

C'èst bén ça, vo mame vos a co r' montè l' tièsse ! ,

**Mady**

Nèn du tout, mins dj' é l' drwèt di fé grève come tèrtout... E bén mi ôdjoûrdu, dj' »disbrèye » come on dit .

**Roger**

E bén !

**Mady**

Asteûre c'èst vous l' mèsse, èyèt c'èst mi l' mèsquène, dj' vos choûte.

**Roger**

Bén, qu' avèz à m' r' prochî ?

**Mady**

Pou yin preumî, qu' vos fuchîje yin p' tit còp pus amoûreus, èyèt d' fé éne crwè d' ssus vo posse di sècrètère ô sindicat.

**Roger**

Non, mins vos dalèz bén ?

**Mady**

Qwè dècidèz ?

**Roger**

Si dj' é comprind bén, vos vourîz qui dj' arête avè l' syndicat, pou m' occupér rén qu' di vous, Mady. Vos vos sintèz bén Mady, vos vos rindèz compte di ç' qui vos m' dimandèz ?

**Mady**

Dj' d' é m' soû di vos ratinde dès eûres ètîres sins sawè si vos dalèz r' venî.

**Roger**

Vos n' avèz nén l' drwèt di vidzér insi, ça n' èst nén djusse !

**Mady**

Putète, mins dj' é l' drwèt di yèsse vèyûe voltî.

**Roger**

Est ç' qui dj' vos é d' dja dit qui dj' n' vos wêyeû pus voltî ?

**Mady**

Paç qu' dj' dis toudis amen à ç' qui vos djèz . . . Pinsèz qui vos vos mwin.nèz come yin ome amoûreus ?

**Roger**

Què âdje avèz, Mady ?

**Mady**

Trinte-cinq ans, Pouqwè ? On n' pout pus vîr voltî à c' n' âdje là ?

**Roger**

An sèrant lès-îs, on dîreut ètinde ène djôn.nète di vint-ans.

**Mady**

Eûreûs' mint pou vous paç qu' , avè l' tièsse qui vos avèz on n' risse nén d' awè l' côp d' foudre come on dit .

**Roger**

Dj' n' wête nén à plère, dj' nén pus l' âdje à djouwèr ô bia Tristan ou Bén à Roméo.

**Mady**

Pou ça i fôreut yèsse yin ôte ome qui vous !

**Roger**

Qwè v' lèz dîre ?

**Mady**

Vos n' avèz nén minme stî capàbe di m' fè yin n' èfant.

**Roger**

Dj' vos-è priye, c' èst nén l' momint di r' vènu la d' ssus.

**Mady**

Eyèt pouqwè ç' qu' on dè pârl' reut nén, ça vos disrindje ?

**Roger**

Ça n' chève à rén di vos fé dèl pwène, pusqui lès docteurs ont tout asprouvè.

**Mady**

Asprouvè qwè ! Dj' m' èl dimande ? . . .

**Roger**

Mins pouqwè yèsse t' t'ossi tièstue ? Vos n' pol' rèz pus jamés awè yin n' èfant pwint c' èst tout, i fôt vos l' èstichî dins vo cabu yin côp pou tout. (Agressif et énervé)

**Mady**

Ca n' èst nén ène rézon pou m' pârlèr d' in ton agnant. .

**Roger**

Vos m' tapèz d' ssus lès nièrs . . . Dj' vos l' r' dî, vos sondjèz d' trop paç qu' vos manquèz d' occupâcion.

**Mady**

C' èst pus ôjî insi . . . Vos n' comprindèz rén du tout ôsès feûmes.

**Roger**

Si lès-ôtes vos r' chèn' nut, vos avèz rézon.

**Mady**

Pa côp, dj' m' dimande çu qu' i m' a pris d' vos-awè mariè.

**Roger**

L' amoûr m' chère . . . L' amoûr !

**Mady**

Yin amoûr sins èfant, c' èst come dès fritches sins sé .

**Roger**

Vos avèz di cès idèyes.

**Mady**

D- acôrd, mins l' goût èst l' minme . . . T' t'ossi fâde !

**Roger**

Dj' n' seû nén rèsponsàbe si vos n' savèz pont awè d' èfant.

**Mady**

Qwè dè savèz ?

**Roger**

La vrémint, dj' n' comprind nén.

**Mady**

Ça pout yèsse vous l'rèspansâbe.

**Roger**

E adon ! Qwè v'lèz asprouvér ?

**Mady**

C'èst qui contrèmint à ç'qui vos pinsèz, lès omes sont pa còp rèspansâbes.

**Roger**

Rèspansâbes di qwè ?

**Mady**

Dj'vous dire qui gn-a ostant d'omes incapâbes qu' d' feumes.

**Roger**

Pou vos c'èsteut clér.

**Mady**

Djustumint, c'èst paç qu' c'èst trop clér qui ça m'chène nèn clér du tout !

**Roger**

Là, dj'comprend co mwins.

**Mady**

Pouqwè ç'qui l' mèdecén ni vos a nèn fé passér ène visite ètou ?

**Roger**

Dijèz rād'mint qui dj'seû yin incapâbe.

**Mady**

Rén n'prouve l' contréle, à mwins qui vos âriz ène coumarâde qu'areut yin n'èfant d'vous.

**Roger**

Mins pou mi vos èstèz djondue, l'contréle n'èst nèn possibe.

**Mady**

Dijès qui dj'seû boune a fé rèsèrer.

**Roger**

Si vos n'boutèz nèn yin còp d'ramon d'ssus vos mwéchès zines, vos risquèz bén sur di vos r'trouvèr à Geele !

**Mady**

C'èst tout ç'qui vos savèz rèsponde, vos èstèz bran.mint pus près à ç'qui s'passe ô syndicat qu'a vo môjone.

**Roger**

Mady qwè ç'qui vos prind ! Vous si pôjère... Si doûse !

**Mady**

Dj'vous è priye, arètèz d'fé l'sézi, èyèt di m'prinde pou ène poupène, ou bén ène mârionète, vos n'èstèz nèn ô syndicat droci.

**Roger**

Dj' n'vos é jamés prîje pou ène mârionète, èyèt co mwins pou ène poupène !

**Mady**

C'èst l'vré, paç qu' ène poupène, on l'prind djns sès bras, èyèt on lyî fé dès doudouces,

**Roger**

Vos avèz yin role impòrtant à djoûwér avè mi, èyèt ça, vos n'èl comprendèz nèn ... Dj'è dandjî d'vous Mady, pou mwin.nér à bén l'batâye pou rèscafé lès drwèts al libèrtè.

**Mady**

Di s'costé la nos n'riskons rén endo Roger ? Nos s'rît bén l'dérén payîs à piède nos libèrtès.

**Roger**

A vo place, dj' n's'reu nèn si sur qui ça !

**Mady**

Pouqwè ça va si mô qu'ça ?

**Roger**

Vos èstèz concyin ? Nos-èstons à deûs dwèts d'yin règime fòrt ... Nos n'arivons pu à nos fé ètinde du gouvèrnemint ... Co ôdjoûrdu is nos ont évoyî les jandâmes !

**Mady**

C'èst nèn l'preumî còp.

**Roger**

Putète, mins ç'qui vos n'savèz nèn, c'èst qui lès colonèls di jandârmèriye, sont st-an raploû avè l'sûretè èyèt qu'is après'nut putète yin còp d'Etat !

**Mady**

Qwè ç'qui vos fé dire ça ?

**Roger**

Yin còp d'tèlèfone d'yin sindacalisè di Brussèle.

**Mady**

C'èst putète yun qu'a v'lu vos fé peu.

**Roger**

Non Mady, nos avons fé survèyî lès alintoûrs dèl jandarmèriye di Brussèle.

**Mady**

Et adon ?

**Roger**

Tout ç'qu'ont pou sawè c'est qu'i gn-aveut bran.mint dalâdje ... C'est pou ça qui dj'seû r'venu mindjî èyèt r'prinde saquants papîs disrindjants.

**Mady**

Vos m'fèyèz peû !

**Roger**

Mady, ène saqwè mô va nos tchèr d'ssus no casake. On s'aprèss' à ène saqwè d'fôrt grâve.

**Mady**

Vos risquèz bran.mint ?

**Roger**

Avè m'posse di s'crètère dèl centrale syndicale, dj'seû bon pou lès mines di sé. (Il ouvre un tiroir et en sort quelques dossiers qu'il remet dans sa serviette)

**Mady**

Come vos èstèz à mwéchès idéyes.

**Roger**

Si ça touîne mô yin djoû, ni roubliyèz nèn qui dj'âre toudis dandjî d'vous Mady.

**Mady**

Vos p'lèz comtér d'ssus mi Roger, dj'vos vwè trop voltî pou vos léyî tchèr, môgré qui dj'vos d'è voû d' è nèn m'awè fè yin n'èfant.

**Roger**

E bén, dj'vos promèt qui l'samwène qui vént, dj'diré passér ène visite.

**Mady**

Eyèt si on dèscouvreur qu'vos èstèz incapâbe qwè f'rîz ?

**Roger**

Nos vîrons bén...

**Mady**

Bon asteûre, i fôt qui dj'm'èvoye !

**Roger**

Vos m'quitèz !

**Mady**

Non in, grand sot, dj'dwè vîr yin n'ôte jénico.

**. Roger**

Vos m'avèz fè peû... Bon à t'taleûr.

**Mady**

Vos n'mi rèbrassèz nèn ?

**Roger**

E bén, ôdjoûrdu, on pout dîre qui dj'vike d'amoûr èyèt d'eûwe frêche, paç qu' dj'ratind toudis m'din.nér. .

**Mady**

Tènèz, v'là toudis yin gros bêche.

**Roger**

Dj'seû cras avè ça mi !

**Mady**

Bâwète, vos n'plèz co mô,

**Roger**

Tout ç'qu'i fôt ètinde tout l'minme !

**Mady**

A bén râde mon gros marou ! ( Elle sort )

**Roger**

Mi v'là div'nu yin tchat asteûre. (Roger vérifie le contenu de sa. serviette)

## Sin.ne 4 Roger adon Fernande

(Le téléphone sonne ; Roger décroche)

**Roger**

Allo ! ... Qwè ? Tout d'chûte ... E bén c'esteut bén l' vré ... Oyi, èl tins d' prinde saquantès loques ... C'est ça, à bén râde ... A place conv'nue ... Salut ! (Roger se dirige vers la chambre, il en ressort avec une valise. A ce moment-là, Fernande entre)

**Fernande**

Vos dalèz an vwèyâdje ?

**Roger**

Dj' n'é nén l'tins d'vos rèsponde bèle moman (Il dépose sa valise sur la table et sort de la chambre pour prendre des effets qu'il déposera dans la valise)

**Fernande**

Yin djoû dj'm'r'vindj're man.nèt sindacalisè (Le téléphone sonne,Fernande décroche) Allo ! Ah c'est vous Môrice ...Oyi ... T'taleûr paç qu' dj'n'seu nén mèrseûle ... Oyi c'est ça, vos plèz comptér d'sur mi.

**Roger**

(Qui revient de la chambre) Vos tèlèfonèz à vo galant ? (Il se dirige vers la table, dépose les effets dans la valise, écrit un mot à sa femme)

**Fernande**

Sachèz bia gârçon qui dj' n'é nén dandjî d'yin n-ome pou mi vikér.

**Roger**

C'est damâdje, ça vos f'reut du bén.

**Fernande**

Vos fèyèz ène lète pou vos séparér d' vo feume (Roger ne répond pas) C'est nén trop timpe, dij'ans c'est long ! Enfin nos gôchisses pète.nut èvoye...

**Roger**

Bèle moman, dj'é l'espwêr quand dj'r'véré, vos àrèz r'trouvé yin ôte twèt ! C'est clér ? (Il dépose la lettre sur la table)

**Fernande**

Vos n'pârtèz nén pou toudis ?

**Roger**

Non ! Mins vous, vos djoûs sont comptès droci, stichèz ça dins vo cabu di mwèche feume. Dj'n' voû pus vos vîr droci quand dj'r'véré....C'est bén compris ? (Il sort)

## Sin.ne 5 Fernande adon Môrice

Il est à peine sorti, Fernande regarde la lettre déposée sur la table, hésite quelques secondes, essaie de lire au travers de l'enveloppe et se décide à l'ouvrir , elle lit :

**Fernande**

« Mon amoûr . . . C'est bén l' preumî côp . . . Dj' seû oblidiî di m'muchî saquants djoû ou bén saquants mwès, Pou l'momint dj' n' pouî rén dire di pus. Dj' vô wè voltî. Roger »

E bén bia gârçon dj'crwè qu'nos dalons awè bran.mint d'pléji. (On sonne, Fernande fait disparaître la lettre dans la poche de son tablier)

**Môrice**

Madame Fernande ...

**Fernande .**

Bén intrèz ! Môrice

**Môrice**

C'est qui ...

**Fernande**

Dj'sé, vos wèyèz voltî m'fîye !

**Môrice**

oyi, mins ça n'est nén pou ça qui dj'seû v'nu

**Fernande**

Bén, ni d'mèrèz nén astampè, vos crèch'rè nén pus savèz. « Pendant toute cette Scène, Môrice inspecte la pièce et ouvre les tiroirs)

Fernande

Yin p'tit whisky come d'abutude ?

**Môrice**

Mêci, mins dj' n'bwè jamés quand dj'boute.

**Fernande**

Ca vos arive souvint ?

**Môrice**

Souvint qwè ?

**Fernande**

Bén di boutèr da.

**Môrice**

Al contréle à ç'qui vos pinsèz, dins l'police on boute pa côp 24 eûres d'asto.

**Fernande**

Ça n'est nén fôrt ôji pou dôrmu . . . Eyèt di r'nachî dins lès ridants ça fèt partiye di vos afères ètou ?

**Môrice**

Vos n'estèz nén sins sawè qui gn-a pus d' gouvèrnèmint !

**Fernande**

Di qwè ?

**Môrice**

Bén v'la, ôdjoûrdu 15 avril, Pus pont d'Europe. Chake payîs r'prind sès mas: pus compte à rinde.

**Fernande**

Comint ça?

**Môrice**

Tout va a l' disblouk. I èst tins di foute dju lès sindicas èyèt lès ôtes.

**Fernande**

Ça n'va nèn pus mô insi, èt adon ?

**Môrice**

Sins ènn'astôche, lès djins sont dès bèdos. Dins leû mizère is âront à mindjî èt yin twèt, pou lès sé qui bout'nut. Lès sés qui n' voul'nut nèn travayî is s'ront mètus d' fôrce dins yin camp di fôrmatons obligatwèr'mint. Pus pont d'chômeus tertous dins lès boutikes. Pou lès prijonîs di drwèt commun lès travôs forcîs survèyîs pa l'ârmèye.

**Fernande**

I' è-st-a pô près tins . . . Tout ça n'm'dit nèn pouqwè çqu' vos èstèz droci.

**Morice**

V'la dès mwès qui... Nos èstons kèrtchîs d'vant tout di nos ocupér d' vo bia gârçon.

**Fernande**

C'èst damâdje, vos arivèz trop r'tôrd. I vint d' vûdî gn-a deûs munutes

**Môrice**

Vos plèz toudis nos dîre èyus' ç'qu'i l' è-st èvoye.

**Fernande**

Pouqwè, vos avèz dandi' dèl vîr !

**Môrice**

D'vizér yin p'tit còp avè lyi

**Fernande**

R'nachî dès mes bidons, ça fé pârtiye ètou d' vos obligâcions

**Môrice**

On nos a d'nè l'orde di fougî vo môjone.

**Fernande**

Fèyèz a vo n'ôje, c'èst quant minme nèn mès bidons ! Vos avèz yin papî pou muchî d'lè lès djins?

Avè l'nouvia régime, nos f'yons ç'qui nos plé, nos prindrons l'drwèt d'muchî à toutes lès eûres d' lèz djins.

**Fernande**

Dj'pou toudis vos foute à l'uch !

**Môrice**

C' n'èst nèn vo n-intèrèt ... Vos risquèz di vos r'trouvèr ô prijon tout bon.mint.

**Fernande**

Come ça!... Après tout mi, dj'n'é rén a muchî.

**Môrice**

Nos savons qu' vos-èstèz avè nos ôtes Madame Londot.

**Fernande**

Fôra m'èscusèr mins dj' n'é nèn yeû l'tins di r'mète di l'alûre.

**Môrice**

Bon asteûre qu'nos èstons rén qu'nous deûs. Qué novèles avè vo fîye ; èle èst toudis t't'ossi djolie ?

**Fernande**

Gn-a rén d'candjî ... Vos l'wèyèz toudis voltî Môrice ?

**Môrice**

Pus qu' jamés, maleureûzemint ça n'èst nèn l'minme pou lèye

**Fernande**

Fôt ratinde Môrice, l' tins arindje tout ...

**Môrice**

Pou dîre l'vré, èle ni vous a jamés rén dît d'mi?

**Fernande**

Nèn grand chòse !

**Môrice**

Ele vos a tout l'minme pârlè d'mi,

**Fernande**

Bén sur !

**Môrice**

Eyèt qwè ç'qu'èle a dit ?

**Fernande**

Qu'èle ni v'leut pus vos vîr droci.

**Môrice**

on pout sawè pouqwè

**Fernande**

Vos avèz stî ène miyète trop intèrpèrdant avè lèye.

**Môrice**



Ca c' èst Bén lès feumes, si on n' fé rén, vos passèz pou yin couyon èyèt si vos f'yèz d'trop, on vos prind pou yin disgoustant.

**Fernande**

Asteûre qui s'n-ome è-st-èvoye pou saquants djoûs ou Bén saquants mwès, vos-àrèz tout l'tins,

**Môrice**

Mady n'a nén dit èyuss' qu'i daleut.

**Fernande**

Non !

**Môrice**

Mady èl sèt putète.

**Fernande**

Gn-a qu'mi qui l'sèt

**Môrice**

Bén, dijèz rât'mint d-abôrd.

**Fernande**

Vos m'promètèz di n'rén dire à Mady.

**Môrice**

Vos p'lèz comptér sur mi

**Fernande**

D'avant d'dalér, Roger a scrit ène lète à m'fïye.

**Môrice**

Dj'pou l'vîr.

**Fernande**

T'nèz !

**Môrice**

(Il lit) Ca n'm'aprint nén grand chôse ... Chouètèz Madame Londot, nos pouîrit fé yin mârchi !

**Fernande**

Yin mârchi !!

**Môrice**

Vos asprouvèz d'conèche èyu ç'qui Roger s'muche èyèt vo fïye n-âra pont d'rûche avè nos-ôtes.

**Fernande**

M'fïye n'a rén à vîr dins lès afêres du syndicat.

**Môrice**

Mins èle èst toudis mariè avè li !

**Fernande**

Qwè ç'qui fôt fé insi ?

**Môrice**

Vos lyi satchèz lès vièrs d's'néz vo fïye avè fjnèsse.

**Fernande**

M'fïye n' m'dîra rén paç qu'èle n'a nén confïyince an mi.

**Môrice**

Vos-èstèz tout d'minme ès'moman

**Fernande**

Oyi, mins èle sèt ètou qui dj' n'pou nén sinte s'n-ome,

**Môrice**

Vu l'situación, rén n'vos èspèche dj' candjî d'atitute, èyèt di vos fé passér ôs îs d'vo fïye come ène moman qu'a bran.mint di r'grèt.

**Fernande**

Quand dj'vos àrèz d'nè l'adresse, qwè ç'qui vos frèz avè Roger ?

**Môrice**

Nos l'mèt'rons ô s'crèt, rén d'ôte.

**Fernande**

C'èst qwè ô s'crèt ?

**Môrice**

Rapôjèz-vous, on n'lyi f'ra pont d'mô, dj'vos l'promèt.

**Fernande**

Tout ç'qu' dj'vos d'mande, c'èst di nén l' r'lachî trop råde.

**Môrice**

C'èst come si s'asteut fé ...Bon asteûre vos r'mètèz l'lète èyuss' ç'qu'èle èstèt.

**Fernande**

Boune idéye, dj'va l'fé tout tchûte. (On entend un bruit) Fôt énn'alér Môrice v'la ène saquî !

**Môrice**

Quand vos sârez qwè, yin p'tit còp d'tèlèfone endo.

**Fernande**

Coptèz d'sur mi.

**Môrice**

Alèz, a-r'vwèrè Madame Londot, 'Il sort)

## Sin.ne 6 Fernande Mady

**Fernande**

(A Mady qui entre) Vos rintrèz pas padrî asteûre !

**Mady**

Dj' v'lè nèn tchér d'ssus vo bia Môrice.

**Fernande**

I n'vos a rén fé

**Mady**

Yin man.nèt flic, qwè ç'qu' i èst vènu fé ?

**Fernande**

I èsteut d'passådje, èyèt i èst v'nu prinde di vos novèles,

**Mady**

Vos èstèz bén sur . . . Téns vos lèyèz trin.nér vo lète asteûre.

**Fernande**

Nén du tout, c'est ène lète di vo n-ome.

Mady ouvre la lettre, elle lit) s'èsteut bén l'vré .

**Fernande**

On pout sawè di qwè ç'qu' r'toûne ? Mady

**Mady**

C'èst nèn vos afères.

**Fernande**

C'èst toute èl confiyince qui vos avèz d'mi ?

**Mady**

Téns, Roger vos intèrèsse asteûre !

**Fernande**

Choûtèz m'fîye, dj'é reflèchi à tout ç'qui vos m'avèz dit t'taleûr.

**Mady**

Eyèt qwè ç'qui ça candje !... Vos vos sintèz bén ?

**Fernande**

Oyi, pouqwè !

**Mady**

Vos n'dalèz nèn m'fè crwèrè qui vos r'grètèz tout.

**Fernande**

Sifè Mady, tout ç'qui vos m'avèz dit t'taleûr m'a tène l'tièsse, vos avîz rézon.

**Mady**

Rézon ... Pou qué afère ?

**Fernande**

Bén di ç'qu' dj'seû, mès mwèches manières, mès idèyes disloyês.

**Mady**

Come di'voureû vos crwèrè ?

**Fernande**

Vos n' d'vèz pupon awè d'doutances, asprouvons d' nos ètinde èyèt di nos vîr voltî.

**Mady**

C'èst bén l'preumî côp qui dj'vos ètind pârlér d'amoûr.

**Fernande**

Si vos savîz m'fîye come dj'seû mô dins m'pia.

**Mady**

Dj'vos-è prîye man ni tchéyèz nèn dins ènn'èr di viole.

**Fernande**

Pou yin côp qui dj'voû moustrér mès sintimints, vos lès r'poussèz.

**Mady**

Mètèz-vous a m' place, gn-a à pwène ènn'eûre èyèt dj'vos r'trouve complèt'mint candjîye ... Avouwez qu'i gn-a d'qwè yèsse sûrprîje, vos n'trouvèz nèn ?

**Fernande**

Eyèt pouqwè nèn, i n'fôt nèn ènn'eûre pou s'rinde consyince di sès vîyes è bièstrîyes.

**Mady**

Putète, c'èst dèl fôte d'à Roger qui vos r'toûrnèz vo frake.

**Fernande**

Nén du tout.

**Mady**

**C'est qwè?**

**Fernande**

Rén, ni nulu, c'est mi mèrseûle.

**Mady**

Dj'ême mieu ça !

**Fernande**

Vos m' moustrèz l' lète ?

**Mady**

Ca c'est mès-afêres, nén lès votes !

**Fernande**

Dj'poû vos bouter yin còp mwin

**Mady**

C'est djinti man, mins dj'd'è vûdréz Bén mèrseûle.

**Fernande**

Dj'djeu ça come ça ... seûl'mint pou vos prouvé qui dj'n'seû pus l'minme.

**Mady**

Quand dj'âré dandjî d'vous man, dj'vos l'dîré ... Mwins ç' qu'gn-âra djins ô courant, mieu ça dîra. (on entend du bruit)

**Fernande**

Vos ètindèz ?

**Mady**

Oyi, ça vént du costè du djârdin.

**Fernande**

Vos n' avèz nén Bén sèrè vo n' uch ?

**Mady**

Sifè ...

**Fernande**

Dj' m'vas vîr. (Elle sort)

## **Sin.ne 7 Roger Mady**

**Roger**

(De la cuisine) Gn-a ène saquî d'ôte dins l'môjone ?

**Mady**

M'moman, pèrsone d'ôte !

**Roger**

Ele n'est nén co énn'alée ?

**Mady**

Pinsèz qu'c'est l'momint di pârlè d'çoula... Dj'é peû Roger. (Entrée de Fernande)

**Roger**

Vos èstèz co là ?

**Fernande**

Fuchèz pòjère bia gârçon !

**Mady**

Dj'vos è priye Roger m'moman r'grète tout ç'qu'èle a pu fé conte di vous èyèt conte di mi.

**Fernande**

C'est l'vré Roger, vos pouvèz crwère vo feume.

**Roger**

Vos m'pèrdèz pou ène bièsse? Arètèz vo chimagrèyes bèle moman, èyèt quitèz s'môjone ç'i sins tordjî, dj' n'èl rèpètréz pus, ni m'oblidjèz nén di mambournèr vo man.nèt visâdje

**Mady**

Vos n'èstèz nén djusse Roger.

**Roger**

Téjèz-vous p'tite sote, vos vos lèyèz èdôrmu pa vo mère.

**Fernande**

Come vos v'lèz bia gârçon. (Elle sort vers la chambre)

**Mady**

Pouqwè nén lyi d'nèr ène chance, èle vént di fé yin preumî pas... Vos pléz fé l'minme ètou, vos n' trovèz nén Roger ? *Roger*

**Roger**

Choûtèz Mady, pou l' momint dj' é ôte chôse à fé qui d'm'ocupér dès umeûrs di vo mame.

**Mady**

Vos m'prom'tèz di fé yin èfôt yin djoû ou bén l' ôte,

**Roger**

Oyi, mins seûl'mint pou vos fé péjî. bon asteûre aprustèz m' satch à dos.

**Mady**

Vos ènn'alèz pou lontins ?

**Roger**

Dj' n'sés nén Mady ... Tout ç'qui dj'poû dire, c'est qu'no démocratie a l'cu è-l-ér, on vént d'arèter saquants professeûs di gôtche. C'qu'èst pus grâve, c'est qu'on èmintche dès tribunâls d'escepcîyons !

**Mady**

Eyèt vous, qwè ç'qui vos riskèz ?

**Roger**

L' gayole ou bén pîr.

**Mady**

Vos n'avèz rén fé ! Yèsse rèsponsâbe d'yin syndicat, c'est nén ène rézon pou yèsse condânè !

**Roger**

Vos vos trompèz, dj'vén d'aprinde qui tous lès prjjonîs di drwèt comun s'ront èvoyîs dins lès mines pou lès r'mète d'alûre.

**Mady**

Rén qu'à vos ètinde dj'frumijone!

**Roger**

L' mieu Mady, ça s'reut di fé vos paquets èyèt di v'nu avè mi.

**Mady**

Gn-a m'moman, vos-y pinsèz ! Qwè ç'qu'èle va fé mërseûle ?

**Roger**

Vos n'avèz rén à vos r'prochî, on n' pout nén d'dire ostant d'lèye.

**Mady**

Vos avèz rézon Roger, mins c'est tout d'minme m'moman, asteûre èle n' èst pus come d'd'vant.

**Roger**

Non Mady, vo mame c'est come ène peûme pourîye, à d'dins.

**Mady**

Vos vos rindèz compte, sins liârs, qwè ç'qu'èle va fé ?

**Roger**

Ele f'ra come tètous, èle dira ô C.P.A.S, si on n'lès fout nén djus !

**Mady**

Eyèt vos m'amwin.nèz èyu ?

**Roger**

Dj' vos l'dirè t'taleûr ... Bén asteûre, i èst tins d'nos aprèstér,

**Mady**

Vos v'lèz sawè ç'qui l'docteûr m'a dit ?

**Roger**

Dj' vos èprîye Mady, c'n'èst nén l' momint.

**Mady**

Bon, bén pus tord. (Ils sortent )

**Noir (Retour au centre psychiatrique)**

## **Sin.ne 8 Lès twès sots et Roger**

Jules est assis dans un coin de la chambre se lisse les cheveux avec la main. Gaston et Albert jouent aux billes)

**Gaston**

Ti vous bén m' rinde m'ma ?

**Gaston**

Dj't'èl dimande a gngnous.

**Jules**

On n's'mèt a gngnous qui d'avant èl Bon Dieû.

**Gaston**

Pouqwè ç'qui ti n'voûs nèn m'èl rinde, Albert ? (Joue avec la bille comme si c'était une femme) Paç' qu' èle èst bèle, èyèt qui dj'seû pètè sot amoûreûs d'lèye.

**Gaston**

Choûte, nos dalons fé yin mârchi,

**Jules**

Pont d'mârchi dins l'môjone du Bon Dieû, à l'uch tèrtous, sins qwè vos s'rèz môdit.

**Albert**

Fôt m'comprinde Gaston, dj' n'pou nèn fé ça ... Qwè ç'qu'èle va dire èl pôve pètte.

**Gaston**

Rén da ... Bon asteûre, pou l'dérins còp, ti vas m'èl rinde sins qwè dj'..

**Albert**

Qwè ?

**Gaston**

Dj'diré m'foute pa-d'zous l'trin.

**Albert**

Ni fé nèn ça, yène di pièrdue, dj' di r'trouvées, wète ç'qui dj'fé. (Il avale la bille) Fôra ratinde dimwin pou l' rawè.

**Gaston**

T'as rézon, l'trin ça fé trop mô, dj' diré m'pinde,

**Jules**

« Albert, ti t' plonge dins la luxûre » l'sègneûr n's'ra nèn contint.

**Gaston**

C'èst bén fé , ti vas yèsse pûni ... (Albert pleure)

**Jules**

Ni bré nèn vî cousse, èl rwèyôme dès cieûs c' è-st-a twè. Pou twè Albert dj'wè lès uchs di l'infyèr grandes ô lôdje, t'ès là à l'intréye, ti fès yin pas, d'yin còp èl m'èscape, intère dins l'infîer, t'l' chûs, ti voûs l' prinde, mins èle èst tél'mint tchôde qui ti n'pous pus l'touchî...

**Gaston**

Arète Jules! Eyèt r' s'rè l'uch, dj' coumince a awè tchôd mi.

**Gaston**

Avè l'cène qui t'as stron.né !

**Jules**

Jésus notre sôveû n'a t-i nèn fèt l'mirake dès pwins.

**Gaston**

Ti f'reûs ça pou mi ! (Entrée discrète de Roger. (Les fous ne font pas attention à lui)

**Albert**

Oyi ! Ca n's'ra nèn tout à fé come lès pwins du sègneûr ...

**Gaston**

D-abôrd, ti poués tout mindjî ... Oyi mins dj'pinse à ène saqwè !

**Albert**

A qwè ?

**Gaston**

Comint ç'qui t'vas fé pou rascoûte tès mas ?

**Albert**

Dj'f're come lès pêchons, pas dj'ènes di cint , ça spitra pas tous lès costès.

**Gaston**

ébia, qui spèctake mès djins!

**Jules**

Non, arètèz sins qwè l' mwin di no sôveûr tchèra sur vo tièsse.

**Gaston**

Tant mieu, i nos don'ra yin còp d'mwins pou lès ramassî.

**Roger**

Si vos plèz ... Tèjèz-vous !

Les fous se taisent, Albert prend son cordon de pyjama et fait mine de pêcher)

**Jules**

Qwè ç'qui vos fèyèz Albert ?

**Gaston**

Chûûût !

**Albert**

Ca-y-èst dj'vén di l'acrochî ! Oyi, douc'mint ... C'èst ça, véns p'tit. Râde, yin còp d'mwin.

**Jules**

Qwè ç'qui t' véns d'atrapér ?

**Albert**

Mon « « ôntinticité culturéle «

**Gaston**

Qwè ç'qui c'est qu'ça di ... 'l'cultûréle ...

**Jules**

Bon Dieû qui t'ès bièsse.

**Albert**

L'ôntinticité culturéle ... E Bén ... Et bén ,, Dj' n'sé nén mi ... Yin djoû yin Docteur dès sots m'a dit : Vous, mon ami, vous manqèz d'ôntinticité culturéle, « vous devez faire une cure de repos pou retrouver votre identité », èyèt c'est pouqwè dj'seû- ci

**Gaston**

C'est quand min, me ène drole di maladie qui t'as là ; ca s'sôgne comint l'ônticité culturelle ?

**Jules**

Par les voies de Dieu !

**Gaston**

C'è-st-impossibe !

**Jules**

Pouqwè ?

**Gaston**

Paç qu' lès vwès du sègneûr sont impèrméâbe.

**Les fous font pas mal de bruit).**

**Roger**

Bén djokèz-vous, dj'n'é nén sèré yin î d'tout' èl nut ètire, èyèt dèl fôte di vos ôtes twès à vos ètinde d' vos cakiyî.

**Gaston**

Ôdjoûrdu c'è-st-yin grand djoû ... Albert va fé yin mirake ? I va fé v'nu d'avant vos ôtes tertous ène banselèye di mas ... Vos dalèz vîr come ça va yèsse bia !

**Jules**

No sôveu a dit « Mangez-en tous et vous serez purifié de toute cette luxure dans laquelle vous vous vôtrez. «

**Albert**

Ô ! là là ! Dj'é mô m'vinte.

**Gaston**

Albert comince a awè lès preumîs môs ... Aprèstèz-vous a vos rafiyî lès bontès du Bon Dieû.

**Roger**

Non mins, is sont complèt'mint djondus ... Si dj'n'vûde nén d'd'ci ô pus râde, dj' m'vas div'nu sot pou d'bon.

(Albert se roule à terre en se tenant le ventre et en poussant des cris atroces)

**Jules**

El distchèyance, bén râde t's'ras là ô-d'zeû.

**Gaston**

Ni rouviye nén di m'rèvoyî mès djasses quand t's'ra ô là-wôt.

**Roger**

I foreut ukî pou l'sognî.

**Jules**

Téjèz-vous Mossieû l'Présidint ..

**Roger**

Vos n'wèyèz nén qui vos cousses n'èst nén dins n'assiète !

**Jules**

Téjèz-vous èyèt choûtèz l' vwè du Bon Dieû dins lès orémus d' Albert.

(Roger frappe des deux poings sur la porte, les trois fous regardent avec des yeux méchants; Albert s'est levé, ils se dirigent tous les trois vers Roger)

**Jules**

T'as cwachî Bon Dieû, asteûre, i fôt payî.

(Gaston et Albert saisissent Roger)

**Roger**

Non mins dj'n'é rén fé, dj'v'leû djusse ukî ène saqui pou sognî vo coumarâde.

**Jules**

Qué couyoneû, ti t'a cochî no bon mèsse ... Asteûre nos dalons t'fé yin goyî come ène tute.

**Roger**

Godom, vos n'avèz pus vos cinq coutias !

**Jules**

Albert donèz-m' l'côrdia d'vo Pijama.

**Albert**

Pou vos fé pléji bia mésse.

**Roger**

Qwè dalèz fé ?

**Gaston**

Vos stron.nèr t't'ôssi râde.

**Jules**

Asglégnèz-vous èyèt fuchéz orpitant.

**Roger**

(Ils se mettent à genoux, à ce moment Albert lui passe le cordon autour du cou et commence à serrer) Djokèz-vous !

Abîye...Abîye (Entrée du docteur)

**Docteur**

Dj' tcheu bén ! Alèz vos ôtes c'est momint di prinde l'ér èyèt asteûre fuchèz pôjères. I n'fôt nèn fé atincion Mosieû Leureux, is sont pa-côps ène miyète zinzins... Yin djou dj'seû arivè trop tôrd. L'maleureû fèyeût pwène à vîr... Deûs trôs a l'place dès-îs

...

**Roger**

Gn-a nèn à dire, c'est pléjant.

**Docteur**

Choûtèz, Mosieû Leureux, c'est bén ôjîye, ou bén vos mûchèz rén ou bén nos dalons fér dès mizères à vo djolîye p'tite feume. C'è-st-intindu ?

**Roger**

Dj' n'é rén a vos dire.

**Docteur**

Vos n'èstèz nèn rézonâbe ! Ni pièdèz l'tièsse ... Nos vos d'mandons di nos rinsègnî d'ssus vos coumarâdes èyèt vos r'fusèz di no bouter yin côps mwin.

**Roger**

Dj'seû nèn yin vindu!

**Docteur**

Vos avèz nèn compris qu'nos èstons lès pus fwârts, rén nos f'ra r'culer pou ressèrer lès dérinds sindacalisses.

**Roger**

Dj' vos avèrti; ni leû toûrnèz jamés l'dos.

**Docteur**

L'peûpe à dandjî d'routèr drwèt. Vos ôtes à fôrce di toudis dire amen. Vos n'èstèz nèn capâbes di vîr pus long qu' lès bètchètes di vos solés. Bran.mint d'alûre amwin.n'ra l' prospérité à no payîs.

**Roger**

Téjèz-vous. Vos roubliyèt qui l'crîje qui nos vikons vént dèl fôte di nos bankes. Is ont djouwé avè lès liârds dès djins. Is ont prèsté sins sawè comint lès djins pourîn.nent payî leûs desses.Asteûre vos v'lèz avè vo binde di moûdreûs wéfi di r'mète l' payîs sur leu pîds ?

**Docteur**

Nos n'èstons nèn dès moûdreûs come vos d'jéz. Nos v'lons édi l'peûpe à div'nu pus eûreû. Pou ça i fôt boutèr pus pou gangnî mwins. Pus pont d'sindicat, mins dès djins rèsponsâbes.

**Roger**

Vos èstèz à rèsèré.

I n'da co pou lontins à choûtèr vos bièstrîyes. Gn-âra toudis dès vindûs pou nos d'nér dès fôs-èspwêrs di libêrtè.

**Docteur**

Istwère nos l'dira ?

**Roger**

C'èst l'vré qu'on pout awè lès minmes racènes èyèt s'prinde pou Pinochet. Pôve payîs.

**Docteur**

Vos avèz dèl chance qui dj'seû dins mès bons djoûs..

**Roger**

Oyi, bran.mint...Alèz-è bwère al buzète !

**Docteur**

E bén... ène samwène di somèye d'asto, vos a fé du bén...Assèz pièrdu d'tins ! Dj'vos done co saquantès eûres pou rêmîner à mès propôsicions.

**Roger**

Vrémint Docteur vos ès ém-èstèz co pus bièsse qui mès pîds.

**Docteur**

Dimwin vos candj'rèz putète d'idéyes, mé dj'é bén peû qu'i n'fûche trop tôrd ... A bén râde, Mossieû Leureux... Téns, v'la vos p'tits copins!

(Entrée des fous)

**Albert**

Mossieû l'Présidint a bén dôrmi ? Merci, mi ètou.

**Gaston**

Nos d-alons fêr yin djeu. L'djeu di margouyi.

**Jules**

No Sint Mésse a-sti ètou margougnî; i èst môrt dins dès nwêres cwachûres pou scaper nos âmes.

**Albert**

Wètèz ç'qui no Mésse nos a doné. (Il montre une lanière de cuir)

**Jules**

(Ils chantent tous en chœur)

L' couche d'èspènes qu'a mascôrdé Jèsus ... Merci dou Jèsus di nos èdî a punî lès djins qui n'crwè.nut nén. Tchantons l'glwère du sègneûr.

**Roger**

Djokèz-vous...S'i vos plé, fûchèz dj' inti, lèyèz-m' dôrmi, rén qu'ènn'eûre èyèt après dj'vos djûre, dj' tchante avè vos ôtes.

**L Jules**

Tèjèz-vous bièsses di grègne. Vos cwachèz l'glwère Du Très wôt.

**Roger**

Bén, dj' né rén dit, mi .

**Jules**

C'èst d'dja yin afront d'yèsse droci. Vos èstèz coupâbe d'awè choqué no mésse vénèrè,

**Albert**

Nos d'vons vos pûni pou vos mwèchès pinsèyes.

**Gaston**

A môrt ! . . . A môrt

**Roger**

Dj' nén rén fé d'mô, Dj' n'seû coupâbe!

**Jules**

Vos avèz di coupâbe ?

**Roger**

*Dj'è di coupâbe?*

*Les fous ensembles*

*I a dit coupâbe.*

**Jules**

Vos avèz di coupâbe ?

Qui pout dire n'awè jamès pont fé mô? Yin vré catolique ni pout wârder ènn'âme sins man.néstè ...Adon, vos n'èstèz nén coupâbe èyèt si vos n'èstèz nén inocint, vos n' èstèz nén catolike. Adon i vos fôt payî di vo pia, pasqui l'oneûr du Très wôt vout qu' lès môs dins vo côrps blankisse.nut lès pétchîs d'vos frères.

**Gaston**

Amen ! . . . A gngnou ! Eyèt qui l' pûniçion comince, Wètèz Jules ç'qu'on m'a doné.

**Jules**

Albèrt èyèt Gaston, vos v'lèz bén aprèster no pôve pétcheû.

**Roger**

Lachèz-m ! Mès vos èstèz djondû.

(Musique – Noir)

## **Sin.ne 9 Cathys Roger adon les fous**

(Roger est recroquivillé dans un coin de la pièce. Cathy entre, elle tient un verre d'eau à la main)

**Cathy**

Mossieû Leureux ... Mossieû Leureux '

**Roger**

A bwère ! A bwère !

(Cathy aide Roger à se redresser) Non, nén là ...

**Cathy**

Bon Dieû bos ... Qwè ç'qu'is vos ont fé ?

**Roger**

Is astinent distchènés ... Oûyouyouye...R'ssatchèz vos mwins.



**Cathy**

Stindèz-vous sù vo vinte, dj' m'va vîr ç'qui dj'poû fé.

**Roger**

Douc'mint, li ch'mise clape à m'pia ...Nén asteûre, dj'vos-è priye ...

**Cathy**

Pus vos ratindrèz èyèt pus ça va claper. Dj' m'va d-abôrd d'nér in côp d'cizète èyèt, quand dj'vos l'dirèz, vos sèrèz vos dints.  
(Cathy commence à découper la chemise)

**Roger**

Fûchèz dj'ntîye, donèz-m' ène cigarete ?

**Cathy**

Dj'r'grète bran.mint, dj' n'fûme nén ... Vos èstèz presse ? Sèrèz vos dints !

**Cathy**

Ca dira ?

**Roger**

Pouqwè ostant d'rûches ... C'èst bén ça, vos m'sognèz pou mieu r'comincî.

**Cathy**

Ni boudjèz nén, dj' m'va qwé dèl pomåde, dj'r'vè tout d'chûte.

**Roger**

Vos n'avèz nén rèspondu.

**Cathy**

Pus târd ... Ni boudjèz nén.

**(Entrée des fous)**

**Jules**

Présidint ! On pout sawè à l'tièsse di qué boutike vos èstèz l'messe.

**. Roger**

Foutèz-m'li pés !

**Jules**

Gaston, Albert ! Vos èstèz tèmwins qui s'n-ome là fèt pârtîye dès profiteûs di no société.

**Albert**

Nos d'vons lyi fè yin procès.

**Gaston**

C'èst qwé yin procès ?

**Albert**

Ratind ti vas vîr

**Jules**

Mètèz l'tâbe ô mitan dèl pièce.

**L Roger**

Clapèz-la, vos m' scrandichèz èyèt vos m'èspèchèz d'dôrmî.

**Jules**

Tèjèz-vous « hérétique »!

**Gaston**

C'èst qwé ça, yin réteki ?

**Jules**

Ca ti r'wète nén, mèts lès tchèyères.

**Albert**

Bén ... Asteûre, on pout comincî. .

**Jules**

Albert véns asto d'mi, èyèt twè d'l'ôte costè.

**Gaston**

Pouqwè qu'ti t'mèts ô mitan ?

**. Jules**

Paç qu' c'è-st-insi ... Bon acûsè astampèz-vous !

**. Gaston**

Crîye pus fôrt, i ètind dur!

**Jules**

Coupâbe, luvèz-vous !

**Albert**

Dj' crwè qu'i n'èst nén d-acôrd.

**Jules**

Nos-y pins'rons ô momint du djudj'mint ?

**Gston**

Oyi !Jules.

**Gaston**

Coupâbe di qwè ?

**Jules**

Minme si nos n'èl savons nèn, lyi, i sèt... Yin sindicalisse a toudis ène saqwè a s'r'prochî.

**Roger**

Arètèz d'vos moustrér d' pus sots qu'vos n-èstèz.

**Jules**

Oyi ! Dj' m'souvén asteûre, vos èstèz rèsponsâbe d'ène lêde afêre.

**Albert**

C'est lyi qu'a vindu lès ouvrîs ô patron!

**Gaston**

On t'a payi combén pa ouvrî vindu ?

**Albert**

Gaston, yin ouvrî ni s'vind nèn come ène vatche, c'est pus fên qu'ça.

**Gaston**

Eûreûs'mint !

**Jules**

Vos èstèz coupâbe d'awè brouyi lès travayeûs ...

**Albert**

D'awè èspèchî lès patrons di gangnî leû viye ...

**Gaston**

D'awè èspèchî l'lacha di no vatches d'ariver dins lès boutikes d'lacha.

**Jules**

D'awè distoûmé lès ouvrîs dèl boune voye du Bon Dieû.

**Gaston**

Avè tout ça gn-a pus qu'al'pinde.

**Jules**

L'tribunâl va s'r'ssatchî pou djudji... Comint ès ce co vo nom ?

**Roger**

Foutèz-m' la pés. . .

**Gaston**

Foutème Lapés ! Drole di nom pou yin sindicalisse.

**Albert**

Ca n'candje tout d'minme rén al pûnicion.

**Gaston**

**Vos d'è mètèz du tins pou l'pinde !**

**Jules**

Clapèz vo bètch ou Bén dj' vos foû tètous à l'uch, Le Sieûr Foutème Lapè ... Dj'vous dîre, li sindicalisse, èstant r'conû coupâbe, nos l'condânons à router a qwate pates twès côps ôtoû dèl tâbe.

**Gaston**

Après nos lyi strôn'rons èyèt c'est mi qui lyi kékîra s'goyî come dj'é fé avè m'feume.

**Jules**

Fûchèz orpitan d'avant l'sègneûr, dimande l'pârdon .. A gngnous pou fé l'tchumin crwè.

**Albert**

Nos ratindons

**Jules**

Dispètchèz-vous sins qwè Gaston s'f'ra yin pléji di vos rinde moya pou l'rèstant d'vos djoûs. (Pas de réponse)

**Gaston**

A m'tôur asteûre ... Fôt nèn awè peu ... Em'feume n'a nèn yeû l'tins di fé ouf !

**Roger**

L'preumî qui m'jonk à mwin d'sû s'visâdje.(Entrée de cathy)

**Cathy**

Alèz mèssieû, asteûre c'est fini, dj' m'ocupe d'lyi.

**Jules**

Atincion Mad'zèle, c'è-st-yin dandjreû sot.

**Cathy**

Rapôjèz-vous, mès amis, dj'é l'abitûde.

**Jules**

Vinèz lès cousses, nos dalons djouwèr..

**Cathy**

Boune idèye.

**Gaston**

Vos tchèyèz a tins !Sins vous, dj'paseû

**Cathy**

Toûnèz-vous, dj' m'va vos mète dèl pomâde.

**Roger**

A qwè bon di djouwer avè mi adon qui vos fèyèz pârtiye dèl minme coum'lâdje ?

**Cathy**

Vos v'lèz bén m'fé confiyance.

**Roger**

Non Mad'zèle à nou pèrsone asteûre.

**Infirmière**

Minme si dj'vos di qui dj' n'seû nén d-acôrd avè l'nouvia rèjime

**Roger**

Pouqwè ç'qui vos èstèz-ci d-abôrd ?

**Cathy**

[J]'bouteu d'dja ci d'avant qu'èl mèdecén colonel ni fuche directeu di l'opitâl.

**Roger**

Rén n'vos èspècheu di pèter èvoye .

**Cathy**

Impossible, Mossieû Leureux, is sont tél'mint bén èmantchîs.

**Roger**

Comint ça ?

**Cathy**

Is pouv'nut toudis fé dès arnodjes à vo famiye ... C'èst pou ça qui dj'seû d'mèrèye èyèt d'yin ôte costè dj'poû toudis édî dès djins come vous.

**Roger**

Vrémint dj'poû vos fé confiyance ?

**Cathy**

Oyi, Mossieû Leureux (un signe de tête suffit)

**Roger**

Mêrci Mad'zèle, dj'è tél'mint dandjî d'pârlér à ène saqui d'bén. Ç'qu'èst malôdjîye, c'èst d'vikér avè dès malâdes dèl tièsse, dès nûts ètîres dj'è peû, Mad'zèle.

**Cathy**

Vos avèz peû d' qwè ?

**Gaston**

Di ç'qui pouûrinent m' fé, on n'poût sawè ç'qui s' passe dins leû cabu, pa côps on direût qu'on poût leû d'vidzer come avè lès ôtes. Et bén Bernic, is candj'nut d'alûre èyèt dj' prind ène ranç'léye.

**Cathy**

Dj'vos asproûve... Vos d'vèz toudis yèsse di leû costè, muchî dins leû djeu.

**Roger**

Pouqwè ç'qu'on m'a mi avè dès sots ?

**Cathy**

Is ont bén sur dès bounès rézons.

**Roger**

Dès bounès rézons ! Vos l'fèyèz èsprès qwè ?

**Cathy**

C'èst nén t't-a fèt ça, qu'dj' v'leû dire Mossieû Leureux.

**Roger**

Dj'èl sé bén m'fiye... Vos v'lèz bén m'fé yin p'tit pléji .

**Cathy**

Dijèz toudis.

**Roger**

Nén grand chôse, alèz.

**Cathy**

Dj , vos choûte mossieû.

**Roger**

Lèyèz tchère Mossieû , ça s'reût tél'mint djinti.

**Cathy**

Eyèt mi, c'èst Cathy

**Roger**

Rén qu'çoula fèt r'veni dins m'keûr ène miyète di bouneûr, si vos sâriz lès angouches quand on èst merseû, nulu pou pârlér.

**Cathy**

Dj' seû là... Bén, Mos ... pardon Roger ! I n'fôt pus tôrdji dj'dwè dalér boutér.

**Roger**

Dj'vos l'd'mande Cathy, dimeurèz co cénq munutes

**Cathy**

Non Roger, i l'èst tins pou mi.

**Roger**

Dj'vos r'viré ?

**Cathy**

Oyi !

**Roger**

Vos d'jèz oyi, mins dins l'fond d'vous minme, vos n'avèz rén a fé d' mi !

**Cathy**

Nos d'è r'pârl'rons, dj'vos l'promèt ... Corâdje Roger !

**Roger**

Oyi corâdje !

NOIR

( **Retour chez Mady** )

## **Sin.ne 10 Fernande Mady adon Môrice**

**Mady**

(Très lointaine) Vos djèz man ?

**Fernande**

A qwè pînsèz, Mady

**Mady**

Vos l'savèz bén, yin mwès sins novèles di Roger, nos n'savons nén minme èyu ç'qu'i èst ... on l'a putète tuwè !

**Fernande**

On n'tuwe nén lès djins insi, fôt awè fé ène saqwè d'mô.

**Mady**

Dj' n'arive nén a comprinde comint ç'qu'lès flics sont-st-arivès djusse ô momint qu'nos d-alin.nent vûdî d'd'ci ?

**Fernande**

Vo n-ome âra stî chû, v'la tout.

**Mady**

Ou bén vindu !

**Fernande**

Pa qui ?

**Mady**

Ça si dj'èl saveû ...

**Fernande**

On vos l' rindra vo n-ome.

**Mady**

Putete, mins arindjî comint ?

**Fernande**

Nos pouîriz putète ukér Môrice.

**Mady**

Vrémint, dj'n-y tén nén

**Fernande**

Vos vos trompèz Mady . . . Paç qu' Môrice n' a qu'a l'vér s'p'tit dwèt èyèt dins ène coupe d'èûres, vo n-ome èst ci !

**Mady**

Mins à qué pris ?

**Fernande**

Vos wèyèz nén voltî vo n-ome pou pârlér insi !

**Mady**

Roger vo manque si fôt, vos èstèz binôje asteûre. Vos avèz ç'qu' vos v'lyiz . . .

**Fernande**

Ni dijèz nén ça Mady, vos savèz bén qui dj'n'seû pus l'minme. Eyèt dj'r'grète tout l'mô qui dj'é pu fé.

**Mady**

Pouqwè ç'qu' vos v'lez ukî Môrice ?

**Fernande**

Paç qu'i n'mi plèt nén di vos vîr maleureûse, èyèt qui Môrice f'ra s' possibe pou vos édî.

**Mady**

Qwè dé savèz . ?

**Fernande**

Môrice a bran.mint d'sintimints pou vous.

**Mady**

Po comincî Môrice, n'a rén à gangnî à fé vûdî Roger d'i s'trô.

**Fernande**

Vos èstèz d-acôrd, oyi ou bén non ?

**Mady**

Dj' n'é nén l'chwè . . . Vos pouvez télêfoner à Môrice.

**Fernande**

C'est d'dja fé m'fiye.

**Mady**

Vos s'rèz toudis l'minme, c'est pus fôrt qui vous, vos avèz co gangnî.

**Fernande**

Pinsèz a vo n-ome èt rén d'ôte.

**Mady**

I s'ra ci dins combén d'tins vo Môrice ?

**Fernande**

C'est l'afêre d'ène munute.

**Mady**

Vos m'dèsbîji avè vos maneûves pou satchî dè plans !

**Fernande**

Bon, dj'vos l'èvoye.

**Mady**

Dj'vos è priye, ni m'lèyèz nén toute seûle avè lyi.

**Fernande**

Vos n'estèz pus yin èfant Mady !

**Mady**

Qwè ç'qui dj'é fé mon Dieû dins m'vîye pou yèsse arindjîye insi ? (on sonne. Elle prend un magazine pour se donner une contenance.)

**Môrice**

Bondjoû Mady

**Mady**

Bondjoû -- Intrèz, sèrèz l'uch M'moman n'est nén avè vous ?

**Môrice**

Non ( silence)

**Mady**

Ni d'meurèz astampè... vos plèz vos achîr.

**Môrice**

Merci Mady.

**Mady**

C'est m'moman qui vos a ukè pas ç'qui mi...

**Môrice**

Vos n'v'lyiz nén, dî'sé !

**Mady**

Dj'é dit oyi, seûl'mint pou Roger.

**Môrice**

Dj' n'vos d'mande rén Mady, si dj'poû vos rinde yin p'tit sèrvice, c'è-st-avè pléji qui dj' vos l'fré

**Mady**

Merci Môrice .. Pusqui vos èstèz dins l'police, dj'voureû sawè eyeûss' ç'qui Roger èt rèsèrê.

**Môrice**

C'est )possibe, c'est minme fôrt possibe.

**Mady**

C'est l'vré, vos poûriz fé ène saqwè ?

**Môrice**

El fé vûdî, ça ... c'è-st-ène ôte afêre.

**Mady**

El vîr, rén d'ôte pou l'momint.

**Môrice**

Doûc'mint, nos-avons tout l'tins !

**Mady**

Vos avèz s'n'adrèsse?

**Môrice**

Bén sur.

**Mady**

Vos m'èl donèz ou bén qwè ?

**Môrice**

Ni fuchèz nén sins pacyince va, ène afêre d'ô côp!.

**Mady**

Bon, bén dj'ratindré vo bon pléji.

**Môrice**

Vos l'ôrèz vo n'adrèsse mins...

**Mady**

Mins qwè ?

**Môrice**

Fôra yèss' bèn djintîye.

**Mady**

Dj'n'comprend nén?

**Môrice**

Vos savèz bèn qui dj'é bran.mint d'tindrèsse pou vous Mady.

**Mady**

Qwè v'lèz ô djuste ?

**Môrice**

Seûl'mint yin p'tit bètch' ... (Mady n'attend pas la .fin de la phrase et l'embrasse sur la joue)

**Mady**

Come ça, ça dira ?

**Môrice**

vos n'm'avèz nén lèyî rachèvér... Dj'voû yin p'tit bètch' pou comincî.

**Mady**

Bèn vos l'avèz yeû

**Môrice**

Nén come ça, dj' n'seû pus yin gamin.

**Mady**

Qwè ç'qui vos v'lèz ?

**Môrice**

Yin vré bètch'!

**Mady**

Vos v'lèz m'fôrcî endo, an fèyant l'mariole... Vudèz... Vos ètindèz, vudèz d' d'ci,èyèt ni r'mètèz pus lès pîds dins m'môjone.

**Môrice**

C'èst come vos vouèrèz, vos m'ukèz quand vos s'rèz prèsse,

**Mady**

Non ! N'dalèz nén, èyèt pûdèz-l'vo bètch' . (Elle tend sa bouche et ferme les yeûx)

**Môrice**

Nén come ça, dj'voû vos sinte bèn à mi.

**Mady**

A vous oyi! Mins come ène feume di mwèch' viye. oyi pûrdèz ç'qui vos ratindèz.

**Môrice**

Lèyèz-m'gouster ç' qui s'ra bèn râde da mi ... Vinèz pus près ... Pus près... ( Une fois Mady à sa portée, Môrice l' embrasse avec force en la serrant très fort. Mady se dégage et giffle Môrice.)

**Môrice**

Sale rosse...ça ma fiye, ça va vos coustèr bran.mint pus tchèr.

**Mady**

( Elle s'empare d'un objet) Yin pas d' pus èyèt dj'vos câsse èl tièsse!

**Môrice**

Come vos èstèz avenante insi. ( Il avance vers Mady)

**Mady**

n'apochèz nén ! ...

**Môrice**

Bon, asteûre on d'djouwe pus, (Il lui donne deux bonnes claques) Fôt yèsse djintîye, sins qwè .-. (Mady pleure en silence )Alèz, rapôjèz-vous. (Il s'approche d'elle et veut la toucher)

**Mady**

Ni m'djondèz nén , Dj'vos wè évî.

**Môrice**

Nos dalons fè yin, mârchtî... Dj' m'arindje pou vos fè vîr vo n-ome eyèt

**Mady**

Eyè qwè . ?

**Môrice**

Vos d'vinèz m'plèji, èyèt Roger âra yin dès faveûrs.

**Mady**

Comint fôt-i vos l'dîre qui dj'n'é pont d'sintimint pou vous ?

**Môrice**

Yin djoû, vos ârèz bèn ène pètte saqwè pou mi.

**Mady**

Oyi bran.mint d'assintimints Adon s'ç'qui vos m'donèz s'n'adrèsse ?

**Môrice**

Dj'é candj' d'idèye.

**Mady**

Vos n'voulèz pus m'è l'donèr ?

**Môrice**

sifét mins nén insi.

**Mady**

Dj' n'comprend nén èyuss' ç'qui vos v'lèz arivèr.

**Môrice**

Dj'pou toudis chèrvu d'facteûr, an ratindant l'pèrmission dèl vîr.

**Mady**

Qwè ç'qui dj'dwè fé pou qu'vos djouwije ô facteûr ?

**Môrice**

Vos lèyèz-m fé tout ôjîye.mint.

**Mady**

Vos m'disgoustèz, Môrice !

**Môrice**

Ça n'est nén l'minme pou mi.

**Mady**

Maleureûsemint !

**Môrice**

Vos dalèz vîr, nos finich'rons Bén pa nos.-ètinde

**Mady**

Qwè ç'qui vos fèyèz ?

**Môrice (Il fait un tour de clef)**

Dj'n'ème nén d'yèsse disrindjî.

**Mady**

M'moman n'va pus tôrdjî, vos-y avèz pinsè.

**Môrice**

Mi p'tite Mady, vo mame passe èl nût dilé ène copine.

**Mady**

C'est m'moman qu'a tout arindjî, c'est ça endo ? Rèspondèz-m ?

**Mady**

Dj' n'sèu nen v'nu pou d'visér d'vo man.

(I s'approche de Mady et la prend par les épaules, Mady à un mouvement de recul. Elle pleure en silence... I fôt nén awè peû , Mady ... ( Môrice commence à la déshabiller, l'éclairage s'estompe ; retour à la clinique)

## Sin.ne 11 Roger le Docteur adon lès sots

**Docteur**

Mossieû Leureux èst toudis t't'ossi tièstu ?

**Roger**

Qwè contèz fé avè mi ?

**Docteur**

Nos v'lons seûl'mint vos wârdér avè nos ôtes.

**Roger**

Dj'n'é rén à vos dire ...Dj'vos rathe ô visâdje.

**Docteur**

Vos div'nèz Bén mô alvé, grossîr Mossieû Leureux.

**Roger**

Vindjèz-vous, qwè ç'qui vos ratindèz ? C'est l'vré, Mossieû fét fé sès man.nètès bèsognes pa dèz malâdes dèl tièsse.

**Docteur**

El dèrène pasquèye dèl bièsse ... Ertènèz Bén souçi, dj'fini toudis pa gangnî .

**Roger**

*Avè yin fusik dins l' dos dèz djins.*

**Docteur**

Come vos m'dispriyîz! Yin djoû vèra èyèt s'djoû là, vos lèch'rèz lès bètchètes di mèz solés.

**Roger**

Çi djoû là, ça n's'ra pus mi.

**Docteur**

Vos èyèt lès ôtes, vos èstèz dèz djins dandjèreûs pou no payî.

**Roger**

Vos pinsèz in rèschèrèr bran.mint ?

**Docteur**

Seûl'mint lès tièsses di bos come li vote ! Vos ôtes l'peûpe vous candjèz souvint cazake, nos ârons ôjîye di leû aprinde no nouvele môde di vikî.

**Roger**

Yin môde sins libèrtè.

**Docteur**

Nos d'vons r'nèchî l'sociète dès vièrs di l'Etat ... Bén råde, n-âra pupont d'place pou lès èmigrès, lès clandestins, lès tchèmeûs, èyèt tèrtous lès ôtes qui s'èrcrâch'nut sul compte dès ouvrîs èyèt ...

**Roger**

Dès ouvrîs ! Vous l'ome di drwète, vos dalèz fê crwère ô peûpe qu'vos èstèz prèsse à disfinde leû tårtine !

**Docteur**

El peûpe f'ra ç'qu'on lyi dira sins qwè ...

**Roger**

Ô potia ... Come ça, dj'comprend

**Docteur**

Mossieû Leureux, si nos èstons dins lès trèyins, c'èst dèl fôte à vo démocrates qu'ont stî ène miyète trop long ...

**Roger**

Trop long ! ... Dins qwè ?

**Docteur**

Dins leûs idèyes d' libèrtè

**Roger**

Quand on vout flayî d'ssus yin tchén. on trouve toudis yin baston.

**Docteur**

Nos avons pris l' voye du pouvwêr sins arnoque. Eyèt vos savèz pouqwè Mossieû Leureux.

**P, Roger**

Dj' m'è dè fou.

**Docteur**

Lèyèz-m' vos l'dîre tout d'minme.

**Roger**

Dj'n'poû rén fé d'ôte qui d'vos choûté.

**Docteur**

Vos p'tits losses, lès démocrates, is ont pètè èvoye come dès lapéns. Eyèt vos savèz pouqwè ? ... Pasqui is sont dès loques qui triyan.nut pou leû pia.

**Roger**

Vos d'jèz dès bièstrîyes.

**Docteur**

Dès bièstrîyes !! Adon qu'is cache.nut misères à nos minisses.

**Roger**

Eyèt c'èst pou m' dîre ça qu'vos m'avèz disrindji? Nos ôtes nos astons pou l'peûpe. Mins al fin. dj' m'dimande pouqwè dj'd'vise avèz- vous .

**Docteur**

Vos èstèz tièstu, Mossieû Leureux... Nos ârons l'toùr pou vos fé pârlér.

**Roger**

C'èst quand vos v'lèz ?

**Docteur**

Putète ... mins vos feume ... Vos feume vos y pinsèz ? (Il sort) Tènèz, v'la vos p'tits coumarâdes

**Jules Gaston Albert ( ensemble)**

Bondjoû no mèsse ... Vos èstèz fiér di nos ôtes ?

**Docteur**

Amusèz-vous bén èyèt fèyèz rîre Mossieû Leureux. (Il sort)

**Jules**

Ôdjoûdu djoû du Sègnieûr... Nos d'vons fièster ça.

**Jules**

Dj' vos r'mèrciye mon fils, dj'vos choûte.

**Gaston**

Dj'sèu d-acôrd, mins pou çoula, nos d'vons trouver yin djeu pou rîre plin no boudène.

**Albert**

Ti sés, Jules ène saqwè alèz... Avès bran.mint d'sang.

**Gaston**

Dj'è ènn' idèye ...

**Jules**

Qui f'ra pléji à no sôveû ?

**Albert**

Bén sur !

**Gaston**

Dj'blèfe d'dja !

**Albert**

V'la, on l'achîr d'ssus ène tchèyère adon on mèt l'feu padzous, s' din.nér s'ra cût insi

**Gaston**

Dj' vou nén



**Albert**

Pouqwè ?

**Gaston**

Dj'è peû du feu.

**Jules**

Di l'euwe bouillante dins lès orâyes.

**Albert**

Nos n'avons nén d'eûwe bouillante

**Gaston**

Alèz ènn'ôte idéye.

**Albert**

L'noyî.

**Gaston**

Nén du tout ... Dj'vos propose l'bigoudi qui tûwe.

**Jules**

Nos n'avons pont d'bigoudi.

**Albert**

Mins nos avons di l'électricité.

**Jules**

Nos sègneûr ni wèt nén voltî lès malôjijes afères .

**Albert**

Clawons-le d'ssus l'crwè ?

**Gaston**

Nén possible.

**Albert**

Pouqwè ?

**Jules**

Nos n'avons pont d'clôs.

**Gaston**

Avè cès mwins ci, dj'poû fé bran.mint... Wètéz... Sèrer s'goyi,lachî, r'ssèrer. Lyi stron.nér Qué pléji mès djins.

**Jules**

Qué boune idéye.

**Albert**

M' chère présidint, fèyèz vos prjyères.

**Gaston**

N'euchèz nén peû, m'feume a yeû l'grand oneûr d'yèsse stron.nèye pa dès frankès mwins. Vos dalèz r'sintî ène tchaleû patavô tout. Adon vos dalèz trian.nér di freûd ... Adon ène grande lumiyère va spitér di tous les costès.

**Jules**

Léd godome Vos s'rèz asto du sègneûr ... N'roubliyèz nén di lyi r'mète no bondjoû.

**Roger**

N'apochèz nén !

**Jules**

Dins saquantès munutes, l'Tout Puissant s'ra la divant vous lès bras grand ô lôdje èyèt dira ...

**Roger**

Co yin pas d'pus èyèt dj'vos skète lès rins.

**Albert**

Ci n-ome là n' vôt nén côp d' yèsse stron.nè pa Gaston.

**Gaston**

Ô preume, i fôt l'noyî dins l'saya d'nût ... tout douç'mint, pou passér l'tins.

**Jules**

R'ssatchèz l'couvièke, Albert

(Les deux autres se précipitent sur Roger et le maîtrisent)

**Roger**

Non, djokèz-vous ... Fûchèz rézonâbes ! (Les trois fous plongent plusieurs fois la tête de Roger dans le seau hygiénique.)

## Noir

### Sin.ne 12 Roger Môrice adon lès sots

**Môrice**

Dj' tcheû bén.

**Roger**

Come vos èstèz prope Môrice ! Eyèt lès stwèles an ôr on dîreut vîr ène saqui! Vos n'èstèz pus l' minme. Cèst l' vré vos avèz l'ér pus fêl, pus malén, ène tièsse qwè! Twès stwèles! Mès vos d'vèz yèsse ô mwins ... Lèyèz-m' advinér ... c'est ça, capitène ! E Bén, mès complimints Môrice. Vos s'rèz Bén râde jènèrâl !

**Môrice**

C'è-st'assé ... Dj'seû kèrdjî pas l'rèponsâbe politique pou vos posér saquantès quèstions.

**Roger**

Dj'n'é rén d'ôte à rajoutér.

**Môrice**

Nos v'lons sawè èyuss' ç qui vos compéres s'much'nut.

**Roge**

V'la tout minme ène boune nouvèle, is n'ont nèn stî pris.

**Môrice**

Si vos èstèz sâdje èyèt si vos m'racontèz tout, dj'vos r'mètréz ène lète di vo feume.

**Roger-**

Dj' n'é rén a vos dîre, èyèt vos pouvèz Bén wârdér l'lète

**Môrice**

Come vos v'lèz Roger, c'est damâdje pou vo feume, paç qu' èle ratindeut ène rèsponse. **Roger**

Comint c'fé-t-i qu'vos avèz ène lète di Mady ?

**Môrice**

Paç qu' vo feume m'a uké ... Ele ni sèt nèn d'mèrer mërseûle ; yin si bia p'tit, muchon, ça s'comprend.

**Roger**

Man.nète wargnasse ! Dj'd'vreû t'fé ravalér tès paroles.

**Môrice**

Toudis t't'ossi agnant Roger, on vos d'mande di fé yin p'tit èfôrt di mémwère, rén d'ôte èyèt dj'vos djure qu'vos r'vîrèz vo feume.

**Roger**

Vos n'pinsèz tout d' minme nèn qui dj'm'va donér mès coumarâdes du syndicat pou pouvèr vîr èm'feume !

**Môrice**

Fèyèz à vo môde ... ça mi r'wète nèn, mi, dj'è sayî d'vos boutér yin côp mwin.. Vos r'fusèz, c'est co vo drwèt, seûl'mint lès ôtes dèl police ni s'ront nèn t't'ossi djintis qu'mi. N'roublyèz nèn qui droci vos n'avèz pupont d'drwèt.

**Roger**

Putète, mins vos n'pourèz jamés m'èspèchî d'pinsèr.

**Môrice**

Minme ça, nos p'lons l'èspèchî ... A rwêr Roger èyèt boune chance !

**Roger**

Non n'vudèz nèn

**Môrice**

Vos candjèz vo fusik d'spale ?

**Roger**

Putète Bén ...

**Môrice**

Dli'vos choûte Roger.

**Roger**

Dj'seû rèsèrè dispû combén tins ?

**Môrice**

Nos èstons l'twès di nôvambe.

**Roger.**

L' twès di nôvambe! Ça fèt pus d'yin mwè qu' dj'seû ci ... Qwè ç'qu'on m'a fê, dj'n'pus pont d'souv'nance ?

**Môrice**

Faleût Bén vos rinde pus pôjère.

**Roger**

Mins pouqwè ?

**Môrice**

Nos avît dèz bounès rézons

**Roger**

D'bounes rèsons, ça ! Mins c'è-st-ènn' atinte à libèrtè dèz djins

**Môrice**

Dispûs l'côp d'état, i gn-a pupont d' libèrtè pou lès céns qui n'pinse'nut nèn come nos ôtes.

**Roger**

Eyèt vous, Môrice, qu'aveut chèrvu no Rwè dispûs pus d'vint ans ?

**Môrice**

Lès rèjimes candj'nut, lès omes d'mèr'nut .. Mi, dj'fé ém dèvwêr rén d'ôte.

**Roger**

Vos n'èstîz nèn forcî d' dîre oyi.

**Môrice**

Non, Roger, gn-a trop lontins qui dj'ratindeû ça. Asteûre, dj'ê l'èspwêr di dêv'nî bén råde commissère al sûr'tè d'l'Etat

**Roger**

Ca fê qui pou vos ambitions, vos pestèlèz d'ssus nos libêrtès !

**Môrice**

C'êst vous èyèt lès ôtes vos estèz lès rèsponsâbes di tout ç'qui s'passe asteûre.

**Roger**

Fôt vrémint yèsse cagnârd èt aveûle pou awè t't'ossi bièsses idèyes

**Môrice**

Adon si vos d'nèz bran.mint d'trop d' libêrtè ôsès djins, is d'è profit'nut èt ça tourne à cu d'pouyon ... Vous lès sindicalisses èt lès fèseûs d'politike, vos fèyèz esprès di d'nér d'pus sins sawè qui ç'qui va payî !

**Roger**

Dj'vwé, vos avèz stî bén èmantchî èyèt avèz ène plène tièsse d' mwéches idèyes ... Vos pinsèz qui l'peûpe va yèsse d-acôrd à vous l' swèt-disant « orde nouvia »

**Môrice**

Nos avons lès r'mèdes pou lès fé dâner èyèt lès fé routér drwèt.

**Roger**

Avè yin fusik dins leu dos ou bén an lès rèsèrant come mi...L'djoû véra èyuss' ç'qui lès djins n'âront pus peû.

**Môrice**

Vos s'rèz môrt d'vant ça,

**Roger**

Ca n'candje rén a ç'qui dj'vén d'dîre

**Môrice**

Bon, asteûre, dj'ê d'dja pièrdu tins insi ... Vos dalèz m'dîre al fin èyu ç'qui s' much' nut lès ôtes rèsponsâbes du syndicat ?

**Roger**

Vos dalèz lès rèsèrer ètou ?

**Môrice**

Ca, c'êst m'n'afêre.

**Roger**

Bén, v'la ... Vos con'chèz les bos du Fièstôs, padrî l'pachî d' amon Namèche.

**Môrice**

Oyi, Bén seûr.

**Roger**

E-bén lovô i-gn-a ène pètitte cassine dins l' fond du bos.

**Môrice**

L'sène du champète ?

**Roger**

L'ôte cayute ène miyète pus long.

**Môrice**

Sacrè Roger, qwè ç'qu'on f'reut nèn pou awè dès novèles di s'feume.

**Roger**

Qwè v'lèz, l'amoûr èst pa-côp pus fôrt qu' èl'rézon.

**Môrice**

Tènèz Roger, vo lète.

**Roger**

Intrèz nos deûs, Môrice, dj'poû vos dîre ène saqwè ?

**Môrice**

Dj'vos choûte Roger.

**Roger**

Vos èstèz ène vrèye trouyèl'riye.

**Môrice**

Nèn ostant qu'vous alèz ... Vos nos avèz d'nè l'bonne cache ? Sins qwè vo compte èst bon ? (Môrice sort)

**Roger**

Roger hésite , tourne en rond dans la pièce, il jette la lettre au milieu de la pièce, la regarde tomber adon la fixe des yeux...Il finit par la ramasser et l'ouvre.

...

»D'dja twès mwès qu' nos èstons long arî yin d'lôte. Pus lès djoûs passe'nut, pus dj' seû dins lès transes. R'vinèz råde èm' n'amoûr dilé mi pou toudis. Dj' seû tél'mint disbôchîye. Tout c'tins là sins vos vîr m'a drouvu lès îs pou mi moustrér combén dj' vos vwè voltî. Oyi, dj'vos vwè voltî m'amoûr. Si vos savîz come dj'd'è gros pou lès arnodjes qui dj'ê pû vos fé. Nos avons pièrdu bran.mint d'bons momints èchènes. Dj' vos vwè voltî. M'chêr Roger dj'ê stî fôrciye di fé n'masse d'afêres contrères pou qu' c' lète-ci vos arive bén. Mins m'n'amoûr èst bén pus fôrt qu'tout...

**Retour chez Mady**

## Sin.ne 13 Fernande Mady adon Môrice

**Fernande**

Comint va Roger ? Vos n'avèz toudis pont d'novèles d's'procès ?

**Mady**

A s' procès ? Lèyèz-m' rîre ! . . . Ene comédiye ! Ene mascarâde avè dès avocats payis pas Vanufel .. Rén n'lès èspèch'ra d'fé passèr Roger pou sot,

**Fernande**

Vos roubliyèz Môrice, I poûreut vos èdi . . . Vos d'vèz li fé confyince.

**Mady**

Li fé confyince, oyi.

**Fernande**

Yin gârçon si djinti, . . . si . . .

**Mady**

Si amitiéûs... yin ome pârfait, vos avèz putète rézon, i couminche à m'plére.

**Fernande**

Dj'èl l'è toudis pinsé, qu'i l' èsteut l'ome qui vos avèz dandji . . . Djon.ne, malén, amitiéûs...

**Mady**

Avè vous !

**Fernande**

Avè vous, I n'l'èst nén, non ?

**Mady**

Si fé . . . bran.mint, d'trop.

**Fernande**

Dj'wè qui dj'n' m'seû nén trompèye èyèt qui dj'é bén fé.

**Mady**

Dj'n'comprind nén !

**Fernande**

C'è-st-à mi qui vos d'vèz vo nouvua bouneûr.

**Mady**

Comint ça ?

**Fernande**

Sins mi, vos s'rîz èvoye avè vo n-ome.

**Mady**

Qwè ç'qui vos v' lèz dire ?

**Fernande**

Bén, c'èst mi qu'a téléphonè à Môrice pou l'prév'nu qui vos èdaliz

**Mady**

A ! C'asteut vous ! Vos v'nèz di tchér dins l'trape; èyèt dire qu'ène eûre d'd'vant , vos èstîz toute mièl, vos r'grètîz min.me vo malice d'ayêr. .C'èsteût djusse pou mieû nos édwarmu èyèt dj'é manki d'vos crwère.

**Fernande**

Mins ...

**Mady**

Non, pupont d'èsplicadje ... Vos n'fèyèz pus pârtîye di m'vîye !

**Fernande**

Mins dj'seû toudis vo mame.

**Mady**

V'la yin mot qui n'duvreut pus jamés vûdi d' m'bouche.

**Fernande**

Vos d'vèz m'comprinde.

**Mady**

Non, gn-a pus rén a comprinde, èl comédiye èst oûte, vos v'nèz di djouwèr l'dérène sin.ne ...Ridô...A l'uch èyè râde è co.

**Fernande**

Lèyèz-m'fé mès pakèts tout d'minme,

**Mady**

Is sont prèsse dispûs ayêr ô nût, is vos ratind'nut dins l' r'mîdje.

**Fernande**

Eyeû ç'qu'dj'va dalèr mi ?

**Mady**

Vos d'mand'rèz à Môrice, avè sès antîzes, i vos trov'ra bén ène saqwè. Bon, asteûre dispèchèz-vous paç qu' rén qu'à vos vîr, dj'coumince a atrapér dès pokètes.

**Fernande**

Dj'vère quér ç'qu'd'mère dimwin.

**Mady**

Come i fêt bon vos n-ârez pus qu'a lès prinde sul'pavée.

**Fernande**

Bén, a-rwère m'fiye ;

(Elle s'approche pour l'embrasser sa fille, Mady se retourne )

**(Entrée de Môrice)**

**Môrice**

Vos énn'alèz, Madame ?

**. Mady**

Oyi' èle va dalér an vwèyâdje.

**Fernande**

Boune chance Môrice. (Elle sort )

**Mady**

Vos v'nèz qwè vo r'compinse come yin tchén s'boukèt d'suke.

**Môrice**

Ça m'aprintra à fé du bén!

**Mady**

Vos avèz stî bén payî asteûre dj' n'é pus rén d'ôte a vos d'nér.

**Môrice**

Mi si fé, minme bran.mint d' pus.

**Mady**

Rén qu' à sinte vos mwins d'ssus m'côr, dj'é ôsse d'r'nôdér.

**Môrice**

Fôra vos abutuwer.

**Mady**

Paç qu' vos pinsèz r' mète ça ?

**Môrice**

Vos n'avèz nén l'chwès.

**Mady**

Dj' n'é pus dandjî d'vos sèrvices.

**Môrice**

Vos roubliyèz qu' dj' n'é qu'a luvér l'p'tit dwêt, èyêt vo n-ome s' r'trouve dins ène gayole sins pus jamés vîr nolu . Pou ramwinri i-gn-a nén mieû.

**Mady**

Qui èstèz pou yèsse sins sintimint?

**Môrice**

Yin flic qui fêt s'd'vwêr.

**Mady**

An pèstèlant lès drwèts dès djins !

**Môrice**

Tén ! Vo n-ome èm'dijèut l'minme t'taleûr.

**Mady**

I n'vos a rén r'mètu yin mot pou mi ?

**Môrice**

Nos n'avons nén yeû bran.mint d'tins d'côzér d'vous.

**Mady**

Dj' n'vos crwè nén, vos n'l'avèz nén vèyu ... Vos mintèz !

**Môrice**

Tout ç'qui dj'poû dire, c'èst qu'i n'èst pus l'minme.

**Mady**

Roger èst malâde ?

**Môrice**

Come ça pou dalér !

**Mady**

Qwè v'lèz dire ?

**Môrice**

I m'a nén falu lontins pou avwér saquants renseignements rapôrt a sés cousses.

**Mady**

Dj' n'vos crwè nén, Roger ni pout mô d'lès vinde!

**Môrice**

Tèjèz-vous, i n'èst rén d'ôte qu'yin n-ome come tertous.

**Mady**

Vos v'lèz putète èm'fé crwère qu'i à trayi sès coumarâde. Ca n'est nèn yin n-ome t't'ossi pourî qu' vous.

**Môrice**

Si f é c'est djuste. I a vindu sès coumarâdes pou ène lète di s'feume.

**Mady**

Ca vos freut Bén pléji...Mins s'i l'freut ça n' candj'rèt rén. Dj'vwè toudis voltî.

**Môrice**

Roger n' m'a rén di d'ôte.

**Mady**

Vos mintèz, èl preûve, c'est qui vos n'avè l' nèn rèsponse .

**Mady**

Vos avèz Bén profitè d'mi, adon qu'vous minme vous n'pouèriz m dire èyu ç'qu'il èst.

**Môrice**

E Bén, si vos èstèz toudis d-acôrd di m'fé pléji, dj'vos promèt qu'après, dj'vos mwin.n'ré vir ç'qui d'mère di vo sindicalisse.

**Mady**

Dj' n'é pus dandjî d'vous,alèzà l'uch man.nètte crapule ! Eyèt râde sins qwè ...

(Mady prend un couteau et se lance sur Môrice)

**Môrice**

Douç'mint m' bèle, nèn come ça.

**Mady**

Yin djoû, dj'vos tuw'ré !

**Môrice**

D-acôrd, mins an ratindant, pinsèz a vo n-ome, ni roubliyèz nèn ! Rén qu'li p'tit dwèt èyèt ... hop ! on n' dè pârlè pus .

Rèflèchissèz a vo n'ôje èyèt si vos candjèz d'idèye ,vos pouvèz toudis m' télèfonér.

## Sin.ne 14 Rogers Cathy adon lès sots

**Cathy**

Roger !

**Roger**

Lèyèz-m' Cathy, dj' n'seû pus qu'ène vîye loque ...Is ont gangnî.

**Cathy**

Non Roger, vos d'vez continuwér l'lute.

**Roger**

Ça n'chèrv'à rén bon, is sont lès pus fwarts.

**Cathy**

Pus pou lontins, l'rèzistance ès-t- amantchîye, d'mwin on âra dandjî d'vous.

**Gaston**

A qué pris.

**Cathy**

L' pris ni compte nèn

**Roger**

Vos d'visèz a vo n'ôje, vos èstèz libe vous !

**Cathy**

Libe !

**Roger**

Jamés pu, vos m'étindèz ? Jamés pus rén n's'ra come d'd'avant, tout a tél 'mint candj' ... Tout èst div'nu nwêr dins m'tièsse, dj' n' crwè pus à rén, ni ôsès omes ni minme a mi **Cathy**

R'prin.nèz confiyince à l'vîye ... Wètèz ôdjoûrdu, c'è-st-yin djoû d'jwé, dj'vos apôrte ène boune nouvèle.

**Roger**

Vo aplèz ça dès bounès novèles ! .

**Cathy**

Si fé !

**Roger**

Dj'seû libe ?

**Cathy**

Non, nèn co.

**Roger**

D-abôrd, i n'pout nèn awè d'bounes novèles.

**Cathy**

Advinèz !

**Roger**

Vos pinsèz qui c'est l'momint d'djouwér ôsès advinias ?

**Cathy**

Escusèz-m' ... Dj' n'v'leû nén.

**Roger**

Qu'avèz a m'aprinde ?

**Cathy**

Dj'é rèscontré Mady.

**Roger**

Dj'vos è priye, n'prononcèz pus l'no d'c ....

**Cathy**

Al fin Roger, dj'é tout fé pou qu'vos poulfiche l'rèscontré !

**Roger**

Vos avèz yeû tôrd.

**Cathy**

Pouqwè ? Dj' n'comprend nén

**Roger**

Gn-a pus rén a comprinde ... M'feume n'est pus rén pou mi...Si fé, ène rén du tout.

**Cathy**

Vos n'estèz nén djusse Roqer, ele a toudis pou vous bran.mint d...

**Roger**

D'sintimints, c'est ça endo ? ... Et bén... Ça n'candje rén.

**Cathy**

Mins pouqwè ? Dijèz-m'pouqwè.

**Roger**

A qwe bon !

**Cathy**

Dj'voû sawé.

**Roger**

Tènèz ... Lijèz..

**Cathy**

...C'est pa amoûr pou vous qu'èl a fèt ça.

**Roger**

Non Cathy, dj' n'pout avalér ça.

**Cathy**

Lèye ètou pôrte l'crwè d'suss'spales

**Roger**

Eyèt d'è l'mèn.ne , qwè d'è fèyèz ?

**Cathy**

Nos vikons dès momints fôrt malôjîs .N'djudjèz nén.

**Roger**

Nén djudjér c'est dire oyi.

**Cathy**

Quand on fé ène saqwè, i-gn'a toudis dès bounès rézons.

**Roger**

On n'passe nén d'suss tout.

**Cathy**

D-acôrd, vos roubliyèz qu'Mady a tout lèyî pou awè d'vos novèles... Pinsèz qu' ène feume s'fôrce sins soufrû dins l'pus pèrfond di s'côr ?

**Roger**

Non putète.

**Cathy**

Pouqwè s'alanmi Mady bén râde ci

**Roger**

Dj' n'voû pus l'vîr, c'est clér !

**Cathy**

R'ssatchèz lès mwèchès èt man ;nètes idèyes di vo tièsse.

**Roger**

El si fôrce avè yin saligot seûl'mint pou awè d'mès novèles !Eyèt c'est'qu'èl man.nèt.

**Cathy**

Vo feume soufreû d'n' pu vo vîr, d'n' pu vos ètinde.

**Roger**

Tèjèz-vous, vos m'fèyèz du mô.

**Cathy**

L'amoûr fèt tel côp mô ! Asteûre choutèz-m' ... Vo feume s'trouve dins l' clinique dj'l'é fèt passér pou n'aprintiye... Ele vèra t'taleur al vèspréye djusse ô candj'mint d'sèrvice. Fûchèz djintî avè lèye.

**Gaston**

A ! Asteûre dj'comprend tout mi

**Jules**

Qwè ç'qui t'as compris ?

**Gaston**

Bén, l'maladiye d'Albert.

**Jules**

T'ès pus malén qu'lès mèdcéens d-abôrd ?

**Gaston**

Fôt nén yèsse mèdcén ! Pou comprinde qu'Albert a atrapè ène méninjite « kulturèl. »

**Albert**

Ti wvès Jules, Gaston n'est né si bièsse qu'on l'pinseut.

**Lules**

C'est qwè... Ene méninjite kulturèl ?

**Gaston**

C'è-st oblidjî ène saquî come nos ôtes di mète dins s'tièsse bran.mint d's'afères pou d'visér ôsès bourjwès.

**Albert**

Gn-a jamés nulu qu'est môrt paç qu'i mucheû dins ène môjone kulturèle ou bén dins yin mûzéye.

**Gaston**

Pou mi lés mûséyes, c'est come lès cèmintières ... Gn-a dès vîs machins chôses aclapès ôsès meu  
ûrs ...ça si fê nén d'muchî avè ène casquète d'ssus s' tièsse sins qwè on ti r'wète di crèsse come si t'èsteûs yin bérjot.

**Jules**

A mèsse, c'est l'minme ètou i fôt r'ssatchî s'calote pou l'biaté di no sègneûr.

**Gaston**

Fôt dire qui dins yin mûzéye, i n's'reut nén mô.

**Jules**

Qui ça ?

**Gaston**

Bén, l'Bon Dieû da .

**Albert**

Ene casquète dins yin mûzéye pouqwè nén mète dès chabots, èyèt ène chique dins s'bouche...

**Gaston**

L'est bon sis avè tès mûzéyes... Mins c'est co pîre qui dins ène tchapèle èyuss' ç'qu'on mèt lès môrts. Là i fôt routér sins brût  
d'ssus l'pwinte di sès pîds ...Mi dj'é yeû l'maleûr di m'pèter a rîre d'avant ène djoliye coumère clawéye ô meûr. A ç'qu'i parèt,  
c'èsteut èl Bèlconde.

**Albert**

La Joconde

**Gaston**

Gèlconde ou bén Joconde... C'est come si dj'aveu fê ène vèsse sonante d'avant l' curé ô momint di « l'èlèvâcion. »

**Jules**

« Tèjèz-vous inculte et choûtez l' dèvize d'yin fi de Minos. »

**Gaston**

Minus twè minme . . . Mi dj' n'é nén dandjî di vo « culture » come vos d'jèz pou trére mès vatches ... Dj' n'cache nén après  
m'condinsé kulturèl.

**Albert**

Nos racènes ... Eyèt pouqwè ?

**Gaston**

Paç qu' dj'é m'culture da mi

**Jules**

Nén possibe en'do !

**Gaston**

C'est nén paç qu'nos èstons dès djins dèl since qu'nos n'pouvons nén d'èn awè.

**Albert**

Fôreut coumîncî pas aprinde a lire

**Baston**

Dj' n'é nén dandjî di sawè lire pou r'conèche ène agasse d'ène mazindje ou bén lès nuwéyes pou m'rinde conte qui va bén  
râde ploûre.

**Jules**

Mi, dj'voû bén mins quand ti véns al vile ti poureus visitér èl Basiliqei, èl môjone di no sôveû.

**Gaston**

Mins pou mi t'ès pètè, èl Basilique, adon qui dj'sèu-st-eûreû achîd al d'venture di cabarèt avè yin vèrè dj' bîre èyèt yin n'èr di  
pianô à bertèles.

**Jules**

Pôve inocint va !

**Gaston**

Inocint, tant mieu, paç qu' èl rwèyôme dès cieus s'ra da mi.



**Albert**

Ti véns djouwér avè nous ôtes a sôt-d'bèdo ?

**Roger**

Vos n'v'lèz pus m'stron.nér asteûre ?

**Gaston**

Pou l'momint, nos avons invîye d'djouwér.

**Roger**

Pouqwè, vos pinsèz r'mète ça ?

**Albert**

Fôra Bén ...

**Jules**

Adon qu' l'tribunâl vos a condânè.

**Gaston**

Bon, asteûre abaches-tu, èyèt dj' sôte !

**Gaston**

Pus wôt, Jules... Atincion !

Entrée de Mady, elle assiste au spectacle.

## Sin.ne 15 Mady Roger lès sots

**Mady**

Mady !

**Roger**

(Sans sentiment) Bondjoû Mady.

**Mady**

Vos n'mi rèbrassèz nèn !

**Roger**

Nos n'èstons nèn tout seû.

**Mady**

Em'visite ni vos fé nèn pléji ?

**Roger**

Dj' pinseû pus vos vîr ... Quand dj'sondje qu' vo bia Môrice a mètu sès man. netès mwins d'ssus vous .

**Mady**

Crwèyèz-m' Roger, i m'a fôrci ... Dj'é tout asprouvè, mins c'èsteut l'seûl moyén pou vos fé pârvèni mès lètes.

**Roger**

Eyèt pou v'nu m'dîre bondjoû, qwè-ç'qu'i a d'mandè ?

**Mady**

Rén d'pus.

**Roger**

Rén d'pus, c'èst qwè ? - - - Alèz rèspondèz ?

**Jules**

Dj' m'présinte ... El brès drwèt du Tout Adonsant, èyèt v'la lès pôves r'pintis ; Albert èt Gaston

**Mady**

Mèssieûs...

**Jules**

E Bén st'èle la, comint avèz fé pou sôrtu du mûsèye mad'zèle?

**Albert**

Fôt nèn fé atincion m' fiye, Gaston n'a pus sès cenq coutias.

**Gaston**

Mi, dj'vos l' dit : c'èst l' Vénus da Emîlyio !

**Roger**

Vos èstèz dins l'bon ... Asteûre fôt nos lèyî trankiles. Si vos èstèz sâdjes, pus tôrd dj'djouw'ré avèz vous.

**Gaston**

Taleûr vos s'rèz « cuic-cuic. »

**Mady**

Mins on vos a mî avè lès sots !

**Roger**

Vos n'èl savîz nèn ? Môrice ni vos a nèn racontè ... C'èst l'vré qu' i l' aveut ôte chòse a fé avè vous qui d'pârlér d'mi.

**Mady**

Pinsèz qu' dj'yeû ôji ! Sinte asto d'mi, sès mwins d'ssuss m'côr !

**Roger**

Vos arîz pus r'fusér di vos lèyî fé.

**Mady**

Vos n'estèz nèn djusse Roger.

**Roger**

Djusse ! Eyèt tout ça pou pouvwr m'èscrîre èt ôdjourdû m'dîre yin p'tit bondjoû.

**Mady**

Paç qu' dj'saveû qui sins mès lètes vos n'ârîz nen t'nu l'côp.

**Roger**

Dijèz pus râde qui c'est vous qu'avèz dandjî dj m'iscrîre, gn-a dès ègayolès qu'esti.nent d'mèrès dès mwès èyèt dès mwès sins novèles di leû feume.

**Mady**

Oyi' c'est l'vrè, mès sintimints pou vous sont si fwarts qui dj'âreû fé tou ç qu' foreut vos vîr ... Dj'pinseu qui vos n'estîz nèn l'minme qui lès ôtes èt qu' vos avîz dandjî di saquants mots d'amoûr pou passér ô triviès dès angouches.

**Roger**

Eyèt c'-è-st-insi vos qu'pinsèz m'ècouradjî an vos d'nant à ènn'ôte. ?

**Mady**

Non Roger, dj' n'mi seû nèn d'nèye, c'esteut ça ou bén...

**Mady**

L'prijon nèn come lès ôtes d' èyu ç'qu'on d'è vûde pus. Vos compèrdèz asteûre ?

**oget..**

Comprinde ! Comprinde !

**Mady**

Nos d'vons d'alér ôd'ssus d' tout ça èyèt pinsér à l'av'ni, d'mète ô crwè avè corâdje èyèt l'èspwér d' vîr yin djoû èl peûpe s'ra choûté.

**Roger**

D'vant ça, dj's'ré môrt ! A qwè bon ça n' chiève à rén !

**Mady**

Ou bén no n'èfant Roger, i nos fôt t'nu bon.

**Roger**

Pou no n'èfant avèz dit ?

**Mady**

Oyi, Roger.

**Roger**

Dispus combén d'mwès ?

**Mady**

Bén râde trwès mwès !

**Roger**

Fôt vos disbarassér di s'n-èfant la.

**.Mady**

Mins c'est no n'èfant Roger !

**Roger**

Dj' n'vou nèn qui m'n'èfant fuche cwachi pus tôrd paç qu'i l' aveut yin père sincalisse.

**Mady**

Nos dirons èchène long d'd'ci. Vos dalèz vîr come nos s'rons eûreûs.

**Roger**

Mady, jamés dj'n'sârè si s'n'èfant-là a-sti tatchi pa ...

**Mady**

Non Roger ! N'dijèz pus rén . . . Si vous soufrichèz dins pus pèrfond di vous nin.me, mi ètou. Ça a stî dur ... Yin cõtchemwâr, dj'é payî tchêr pou vos vîr saquantès minutes ... Dj'é tèl'mint yeû peu qu'on vos fèye du mô ... ètd'pus ... Pârdon Roger !

**Roger**

...Commint pinsér l'omér l'èfant ?

**Mady**

Roger

**Roger**

Pôve èfant, comint dalèz fé pou l'alvér ?

**Mady**

Dj'i f'ré come bran.mint, dj'boutré nût èt djoû ... Mins vos s'rèz la Roger !... Vos s'rèz-la, endo.

**Roger**

Promètèz-m' di n'jamés mète no n'èfant dins lès mwins di vo léd mouzon d' mame.

**Mady**

Ça n'pout nèn mô, dj'vén dèl tapér à l'uch.

**Roger**

Pouqwè?

**Mady**

Nos d' r' pârl'rons pus tôrd !

**Roger**

Comint fèyèz pou vikî?

**Mady**

Lès djins du sindicat m' don.nut yin côp mwin.

**Roger**

Vos lès vwèyèz toudis ?

**Mady**

C'è-st-a dire qui c'èst l'facteur qui m'chève di bwèsse ôs lètes.

**Roger**

Brave Victor va !

*(Entrée de Cathy)*

## ***Sin.ne 16 Roger Mady Cathy adon Môrice***

**Cathy**

Madame, i l'èst tins!

**Mady**

Co deûs p'tites munutes si-vo-plèt !

**Cathy**

Prèssèz-vous.

**Roger**

Mady, pèrdèz bén sogne di vos deûs.

**Mady**

Roger.!

**Roger**

Non Mady, dj'voû vos vîr vos èdalér avè l' sourîre ni m'gâtèz nèn m' dérène imâdje... Coradje, Mady, coradje !

**Mady**

(Elle s'approche pour l'embrasser)

**Roger**

Non Mady! (Sortie de Mady)

**Albert**

Bèle coumère, mès complimints, Mosieû l'présidint! Mins ça n'candje rén à ç'qu' nos avît dècidè.

**Gaston**

Eyèt dins l'lit ... Dj'èle vwè couitchîye dins lès strins, lès lès djambes grandes ô lôdje, dj' m'aprotche ... Es'pwètrine s'soulève douç'mint a chakin d' bat'mint s'keûr. inocint !

**Roger**

(Saute sur Gaston, il le prend à la gorge et serre de toutes ses forces) T' vas t djokî ... T' vas t' djokî di !

**Jules**

Ni boudje nèn Albert, lèye fé lès mwins du sègneûr

**Albert**

E bén, lès mwins du sègneûr son-st- entrin di stron.nér Gaston. ( Entrée de Môrice)

**Môrice**

Roger ! Vos pèrdèz l' tièsse ... Alèz, vos ôtes, vûdèz di d'ci èyèt èmwin.nèz Gaston pou sognî.

**Roger**

Vos v'nèz quér vo vindjîyince ? Dj'dwê putète vos dire merci d'yèsse d'v'nu avè m''feume !

**Môrice**

Ele a trouvé l'adrèsse...Qué gale. Qu'ç'qu' l'a fé muchî droci ?

**Roger**

Qui ?

**Môrice**

Ni fèyèz nèn l'bièsse, Mady èst v'nûwe droci. Rèspandèz !

**Roger**

Mady n'èst nèn v'nûwe du tout.

**Môrice**

Vos mintèz ! Mins dj'saré l'vrè èyèt ça vos coust'ra fôrt tchèr.

**Roger**

Vos n'èstèz qu'yin p'tit minâbe. Yin lèche l'cu dès assassins. Eyèt tout ça pou yèsse ène saqui... Capitène boûria !

**Môrice**

An ratindant vos èstèz à mès guètes. C'èst quand dj' vouré, à l'eûre qu' chwèsiré... Dj'vos f'rè soufri. Asteûre vos dalèz m' dire qu'ç'qu' amwènéé vos feume droci ?

**Roger**

Nulu.

**Môrice**

C'è-st-impossibe, l'clinike èst survèyîe nût èt djoû.

**Roger**

Dj' n'é nén vèyu m'feume.

**Môrice**

Eyu ç'qu'èle d'meure ? Râde...

**Roger**

... Amon s'mame, dj'pinse.

**Môrice**

Ele ni vike pus avè lèye .... Vos l'savèz ! Rèspondèz !

**Roger**

A ? C'èst éne boune novèl !

**Môrice**

Bén... Avè nos r'mède, l'mémwère vos r'vinra.

**Roger**

Dj' n'se rén du tout.

**Môrice**

Is dîj'nut tértous ça pou coumincî, après is candj'nut râde d'avis.

**Roger**

Vos vos sintèz fôrt paç qu' vos avèz yin nouvia costume d'ssus vo dos èyèt saquantès stwèles al bètchète di vo col, mins vos n's'rèz jamés qu'yin p'tit minâbe flic ... Sins vo t'nûwe, vos n'èstèz rén !

**Môrice**

An ratindant, dj'vos tén dins mès mwins come dj'é t'nu l'côr di vo feume.

**Roger**

C'èst l'vré mins vos n'avèz rén yeu d'ôte qui s'côr . M'feume m'a tout raconté.A vo place, dj' n'mi vant'rè nén ! A... Quand vos avèz vo t'nûwe di flyic d'ssus vo dos, vos vos sintèz yin dur ... Mins tout nu, vos n'd'vwèz pus yèsse si fièr qui ça !

**Môrice**

Vos cachèz à m'rabachî in ? Mins dj'ârè m'toùr bén râde. dj'prindré m'pléji à vos ètinde criyî èyèt pârdon.

**Roger**

Pèrdèz vo pléji seûl'mint èyèt qu'on d'è finiche tout chûte sins lès twès sots poulin.nent bén fé l'bèsogne à vo place.

**Môrice**

Asteûre, i fôt fé râde, dj'vos d'mande pou dérin còp d' nos édi a mète l' mwin d'ssus vos coumarâdes èyèt après dj'vo promèt èl libèrtè pou vo feume.

**Roger**

Vos avèz rèsèré m' feume ètou ?

**Môrice**

Nén co. Mins èl n'd-ira nèn long.

**Roger**

Qwè ç'qui vos v'lèz dire ?

(Roger prend Môrice par la gorge, Môrice essaye de se dégager et sort le révolver)

**Môrice**

Doûcemint!... Oudoubén dj'satche !

**Roger**

Bén alèz-è... Satchèz ! Vos èstèz bén trop couyon !

**Môrice**

Yin pas d'pus èyèt dj'satche dins vo djambes.

**Roger**

Vos n'ârîz nén l'courâdje d' m'tuwér ?

**Môrice**

Dj'é dandjî d'vous vikant. Vos n'vol'rîz nén qu'i arive ène saqwè d'mô à d'mô a vo feume endo ?

**Roger**

Lèyèz m'feume trankile ...

**Môrice**

Adon, dj'vos choûte d-abôrd.

**Roger**

Vos avèz yeû s' n'adrèsse, qwé v'lèz d'pus ?

**Môrice**

L'ôte djoû, vos vos avèz foutu d'mi.

**Roger**

Dj' n'wè nén comint !

**Môrice**

Arètèz d'fé l'malén. L'ôte còp vos m'avèz d'né ène mwéche adrèsse.

**Roger**

Nén possibe endo !

**Môrice**

Vos n'pièrdèz rén pou ratinde m'n'ami.

**Roger**

Lèyèz tchèr « ami », c'é-st-in mot qui sone mô dins vo bouche.

**Môrice**

Vos pourîz fé yin p'tit èfòrt.

**Roger**

C'est Bén astcheût. Lès drogues m'mémwère è-st-in p'tit còp d'astòdje.

**Môrice**

Ele l'èst co ?

**Roger**

Qwè ?

**Môrice**

Bén vo mémwère !

**Roger**

Oh ! ça va mieu, mins dj'nén pus pont d'souvenance

**Môrice**

Fèyèz m'confyince ça vos r'véra râde.

**Roge**

Vos fé confyince ? Ca dj'l'sé. Mins ostant vos l'dîre toutchûte, dj' n'sé rén !

**Môrice**

N'djouwèz nén avè mès pîs, vos pourîz l'r'grèter.

**Roger**

Bawète... Dj' n'mi fé nén dès fòssès idèyes d'ssus m'sòrt.

**Môrice**

Tièsse di bos, vos l'ârez voulu. Vos dalèz soufri bran.mint.

**Roger**

Vos n'ratindèz qu'ça. (Môrice sort)

## ***Sin.ne 17 Cathy Roger adon le docteur (Vwè off du Docteur)***

**Docteur**

Bonswêr Mossieû Leureux, vos èstèz prèsse à choûter deûs p'tis copins d'ssus yin ér di Sibelius ?

**Roger**

Alèz-è ô diâle.

( Roger se couche.... La musique et les cris des torturés se font entendre doucement d'abord pour s'emplifier de plus en plus...Roger se bouche les oreilles mais rien n'y fait)

**Gaston**

Arètèz ... Arètèz !

**Docteur**

C'est ôji, vos nos signèz yin papî qui dit qu'vos èstèz pou nos ôtes. Bén sur vos nos d' nèz l'lisse dès djins di vo n'organisâcion.

**Roger**

Alèz -è ô diâle

**Docteur**

Boune nût, Mossieû Leureux !

(La musique et les cris des torturés se font entendre s'emplifient de plus an plus...Cette situation devient insupportable pour Roger.)

**Docteur**

Yin p'tit èfòrt Mossieû Leureux èyet nos lèy'rons vos amis trankile... Dj'aleû l'rouviyî, vo feume vou'reut Bén vos dire bonswêr...

**Mady**

Nén yin mot Roger, i n'fôt rén dîre ! Ouye...ouye... Non nén ça ... !

**Roger**

Mady ... ! Mady ... !

**Docteur**

Ca n'est rien Monsieur Leureux, vo feume vént d'arokî s'tiesse d'ssus d' l'bôrd dèl tâbe; èle èst quèqu'fîye mô adwète !

**Roger**

carogne ... ! man.nèstè ... ! saloprîye ...

**Docteur**

Fuchèz rézonâbe, vos t'nèz à vo feume èt nos ôtes nos t'nons al lisse d'vos p'tits amis.

**Roger**

Dj'voû vir m'feume ... Dj'voû vir m'feume.

**Docteur**

Avè pléji Mossieû Leureux, vos pol'réz constater qu'vo feume va Bén ... Putète qu'èle âra pus d'chance qui vous.

## ***Sin.ne 18 Roger Mady Docteur adon lès sots***

*(la porte s'ouvre et Mady se précipite dans les bras de Roger)*

**Mady**

Mady !

**Mady**

Roger, dj' n'é ...

**Roger**

Chûûût ! (Il lui montre le micro) Qwè ç'qu'is vos ont fé Mady ?

**Mady**

Rén !

**Roger**

Rén èyèt vos avèz yin roudje vizâdje!

**Mady**

Ça n'est rien du tout... Pinsèz t'ni lontins ?

**Roger**

Dj' n' d'è sé rén, dj'n'sé pus Mady.

**Mady**

Vos d' vèz t'ni bon Roger, pou nos ôtes, pou nos èfants à v'ni ;

**Roger**

Jamés dj' supôrt'réz qu'on n'vos fèye du mô.

**Mady**

Dins l' chwès qu' vos fréz, mi dj'n'compte nèn à costè di nos èfants, di nos libèrtès èt pou qu'yin djoû on nos rinde nos drwèts.

**Roger**

Vos avèz putète rézon mi p'tite Mady mins dj' n'seû qu'in ome avè dès bons èyèt dès mwès costès.

**Mady**

Non Roger ! Vos, vos èstèz batu dispûs vint cinq ans pou disfinde lès drwèts èyèt dès libèrtès dès ouvris... Vos m'avèz fé ratinde dès èures ètires . Vos m'avèz r'fusè bran.mint dès côps pou vo syndicat . Nos âriz pus nos mète èri yin d' l'ôte. Asteûre vos vourîz ... Non.

**Roger**

C'est bon asteûre ! Nos èstons mwin.nès pas dès fachos, is vont fé d'nous dès bèdos, qwé fé ? Is ont l'pouwêr. Mins, no môde di pinsèye, jamés is n'pol'ront nos l'r'prinde.

**(Entrée du Docteur)**

**Docteur**

Vinèz Madame, vos dalèz vîre ç'qu'd'mèra di vo n-ome après qu'nos l'ârons misbrîdji .

**Roger**

Foutèz l'pès à m' feume.

**Docteur**

Rapôjèz-vous Mossieû Leureux, vo feume n'souf'ra nèn dins s' côr mins seul'mint dins s'tiesse.

**Roger**

Carogne !

**Docteur**

Pouqwè vos tère ?

**Mady**

Non Roger, nèn yin mot !

Vinèz Mosieû Leureux nos dalons r'nèchyî vos idèyes .

**Le médecin les entraînent vers la sortie**

**La scène reste vide. De loin on entend les fous qui chantent.**

*Sin.ne 19 Lès sots Roger puis Cathy*

**Gaston**

Ti n'as rén d'ôte à tchantér ! ça m'rind tout drole mi

**Jules**

Eyèt vo n'âme, vos i avèz pinsè ?

**Gaston**

Dj'âreû d'dja dès rûches, dj' n'l'é jamés vèyu

**Albert**

T' sés bén qwè Jules!

**Jules**

Non !

**Albert**

E bén, t'Bon Dieû coumence à m'tapér d'ssus lès nièrs, dj'comprend pouqwè ç'qu'on t'as rêssèrè ?

**Gaston**

Ti t'as fé passér pou yin Curè, v'là toute l'istwêre.

**Jules**

Nén du tout ! ...

**Albert**

C'est l' fôte d'à qui ?

**Jules**

Bén v'la, dj'é mètu l'tchat du vijin dins l'four à micro ondes.

**Gaston**

Dins yin four à micro ondes !!! C'est qwè çoula ?

**Jules**

Dj' n'sé nén, mins ç'qui dj'sé, c'est qui l'tchat a cû tout vikant.

**Gaston**

Et adon ?

**Jules**

Bén i èst môrt da !

**Albert**

El n't'aveut rén fé s'pôve bièsse la !

**Jules**

Ti pines twè ! Dins sès îs, dj'é véyu lès imâdjes da Lucifèr.

**Gaston**

Eyèt c' èst pou çoula qu' t' ès droci ?

**Jules**

Dj'seû ci an « mission especiâle. »

**( Roger entre le regard lointain, complètement absent . Les mains jointes comme s'il priait. Il s'assied sur la chaise centrale face aux public sans quitter son attitude. Les fous s'approchent de Roger)**

**Jules**

Chûûûû ! I n'fôt nén l'disrindjî. ..., i è-st-an comunion avè l'Tout Puissant !

**Gaston**

I fêt tout d'minme yin drôle di visâdje.

**Roger**

Dj'vos è priye, pus ça ... Pus ça !

**Albert**

Qwè ç'qu'i dit ?

**Jules**

Téjes-tu ...

**Roger**

Ron-ron macaron m'p'tite cheur è-st-ô prîjon ... Alèz, vinèz. Nos dalons djouwér, t'nèz-vous pa l'mwin ... Nos i èstons ?  
Ron-ron macaron m'p'tite cheur è-st-ô prîjon.

**Albert**

Wète ! V'la qu'i brèt asteûre. C'est dè t' fôte.

**Gaston**

Mins dj'n'é rén fé mi !

**Jules**

Si fé, ti tchantes fôs !

**Gaston**

Dodo l'èfant do, l'èfant dôrm'ra bien râde.

**Jules**

Vinèz mès amis, nos dalons dè fé ostant.

## Sin.ne 19 Roger les fous et Cathy

**Cathy**

Roger ... Roger

**Roger**

Dj'vos é dit qu'ôdjoûrdu, dj' n'bouteû nén !

**Cathy**

Roger, dj'vos è priye, dispêchêz-vous !

**Roger**

Moman, pouqwè avèz mi vo blank cindrén?

**Cathy**

Dj' n'seû nén vo moman, dj'seû Cathy.

**Roger**

Qwè ç'qui vo f'yèz dins no môjone ?

**Cathy**

Nos n'avons pont d'tins à piède, mètèz râd'mint ça d'ssus vo dos.

**Roger**

Dj'seû scranse, lèyèz-m' dormi.

**Cathy**

Vos n'm'comprindèz nén...Dj'seû v'nue pou vos fé vûdî d'd'ci !

**Roger**

Vos v'lèz v'ni avè mi ? Qwè ç'qu'èle va dîre èm'moman ?

**Cathy**

Pôve Roger, is l'ont complèt'mint brouyî.

**Roger**

M'moman sèt bén qu'vos èstèz ci ?

**Cathy**

Oyi, èle vout minme bén qu'nos dalîn.nent fé yin toûr, rén qu'nos ôtes deûs.

**Roger**

Ele a dit ça ? ... E bén, èle èst bén candjiye.

**Cathy**

Mètèz vo n' impèrmèyâbe sins qwè pont pourmènâde

**Roger**

Savèz bén qu'i fêt nwart.

**Cathy**

Qwè ç'qui vos f'yèz ?

**Roger**

Mins pou mi vos èstèz djondûwe, m'oblidjî à d-alèr ô bôs avè vous ô plin mitan dèl nût !

**Cathy**

Dj'vos è priye, Roger, vo feume vos ratind !

**Roger**

Mins qué feume ?

**Cathy**

Mady ! Mady...

**Roger**

Ah téns ! C'èst nouvia, dj' n'saveû nén qui dj'èsteû marjyè ,mi.

**Cathy**

Eyèt dîns sèt mwès vos s'rèz popa !

**Roger**

Dj'âreu dès rûches, dj' n'coneû nén minme èl djolîye coumère qu'a fé ça avè mi.

**Cathy**

Dispêchêz-vous, on nos ratind savèz ...

**Roger**

E bén non ! vos n'm'ârez nén !

**Cathy**

Mins enfin Roger !

**Roger**

Gn-a pont « « d'mins enfin Roger ... Dj'vwè bén clér dins vos rûzes.

**Cathy**

Qué rûzes ?

**Roger**

Dj'wé clér dins vo djeu, mins vos n'm'ârez nén.

**Cathy**



Mins qué djeu on si-vos-plé ?

**Roger**

Vos v'lèz m'distoûrnér dèl drwète voye ... « l'orde nouvia ! »

**Cathy**

Non Roger, nén vous !

**Roger**

Toutes lès minmes ... C'est fini, dj' n'é pus d'tins à piède, is no fôt boutér pou èspèchî lès sindicats d' foute tout l'ér.

**Cathy**

Es-ç' qui vos v'nèz ?

**Roger**

Dimwin, nos dalons èmantchî ène novèle société

**Cathy**

Vinèz Roger, Mady nos ratind. Alèz vinèz !

**FIN**